
محمد عنانى

ليلة الذهب
ومسرحيات أخرى



الهيئة المصرية العامة للكتاب

١٩٩٣

تصميم الغلاف :

نجوى شلبي

الإخراج الفني والتنفيذ :

صبره عبد الواحد

-
- ١ - ليلة الذهب
 - ٢ - جه عليه الدور
 - ٣ - نهايته !
 - ٤ - ولا فى أمريكا
-

•

•

•

•

•

•

تصدير

هذه أربع مسرحيات من ذوات الفصل الواحد ، ولكنها تخرج عن هذا الإطار خروجاً بينا إذ لا تلتزم بوحدة الزمان ، فهي فى هذا أقرب إلى المسرحية التليفزيونية أو قل إنها نوع مختلط يمزج بين المسرح التقليدى الذى يؤكد وحدة المكان والحدث فى مسرحية الفصل الواحد ومسرح التليفزيون الذى يتمتع بحرية من وحدة الزمان بل هو يتمتع فى الواقع بالتححرر من وحدات المسرح جميعها !

ولكن السمة التى تجعل لكل من هذه المسرحيات علاقة وثيقة بفن المسرح كما نعرفه لا تقتصر على وحدة الحدث والمكان فى كل منها ، بل هى فى الحقيقة تناولها لشخصيات محورية يدور الحدث المسرحى فى داخلها ومن حولها بحيث يصبح القيد الزمانى فى المسرحية التقليدية عائقاً لأمعنى له . وإذا كان صحيحاً أن الحرية التى أعطيتها لنفسى فى الحركة عبر الزمان حرية محدودة ، فهي لاتتعدى الأيام القليلة فى

معظم المسرحيات التي كتبتها ، فإن الزمن نفسه يبرز باعتباره
البطل الأول في مسرحية (جه عليه الدور) ، ومن هنا كان
تركيزى على حرية الحركة فى الزمن .

وقد كتبت المسرحيات الثمانية ذوات الفصل الواحد : -
ليلة الذهب ، ولا فى أمريكا ، جه عليه الدور ، نهايته ،
حلاوة يونس، تحت التشطيب ، قصة منزل، انت فين
يابا ؟ - والمسرحية الطويلة السادة الرعاع - فى باريس
أثناء مقامى الإجبارى للعلاج من مرض عياء ، وقد استطعت
فى شتاء ١٩٩٢ - ١٩٩٣ أن أنتهى منها جميعاً فى صورتها
الأولى ثم عكفت عليها بالتشذيب والتهذيب (والإعادة أحياناً !)
طوال صيف ١٩٩٣ حتى خرجت فى هذا الشكل المضغوط .
وأظن أننى لو توفرت على كل منها وأولييتها ما تستحقه من
جهد لخرجت بأضعاف الصفحات الحالية ، لأننى أرى فى كل
منها مادة أكبر مما تحتمله المسرحية ذات الفصل الواحد .
وإذا مد الله فى عمري فسوف ولا شك أعود إلى بعض
موضوعاتها للعلاج المتأنى .

محمد عنانى

القاهرة ١٩٩٣

ليلة الذهب

مسرحية من فصل واحد

١ سكن أسرة متوسطة من الرهبان البحري على
شاطئ النيل . أُنشأ الجيل السابق هو الكنيسة
الاسطيمبولي واللوان أي الأريكة الخشبية ، وبناء
البيت فيه مضير أي فتحة مستديرة توصل بين
الطابق الثالث والرابع حيث تدور الأحداث .

٢ عندما يرتفع الستار تكون صاحبة المنزل
الستة أئينة في أواسط الثلاثينات تنتظر فتحية
الوسيلة التي على صلة بكودية الزار وتكون في
حالة تحضير البخور ومستلزمات زيارة السيدة ذات
التأثير الفعال - وهي تأمر وتصيح وفي حالة هياج
شديد ١ .

أمينة : (تنادي) حكمت .. حكمت .. حكمت .. إنتي
فين ؟

الضهر قرب يدن والبيت يضرب يقلب .. ما في
حاجة في مطرحها .. ما في شئ اتعمل ..
يعنى نقول للضيوف إيه ؟ خليكو شوية في
الدھليز لما نخلصوا ؟

حكمت : هو فيه إيه ناقص يا ماما ؟ ماكل حاجة
اتعملت ...

أمينة : كل حاجة ؟ الأكل خُص ؟ السفرة جاهزة ؟
العيش اتسخن ؟ البطيخة اتقطعت واتحطت فى
الثلاجة ؟

حكمت : أولاً الأكل يخلص على مهله .. وثانياً ..
أمينة : يابت إتحركى .. أنا عارفه إنتى طالعة لمن ؟
كلنا قلوبنا حامية وما نقدروش نستنوا من غير
شغل .. أمنت بالله .. صدق اللى سماكى
حكمت ..

حكمت : سميتونى حكمت عشان جيت بعد كام بنت
وكننتو عايزين ولد ..
أمينة : تقومى تدوخينا السبع دوخات ؟ لا عايزة
تشتغلى .. ولا عايزة تتعلمى .. ولا عايزة
تتجوزى ..

حكمت : يا ماما أنا عارفة إنك مضايقة عشان الذهب ..
وعندك حق .. لكن .. بكره فتحية تطلعها لك من
تحت دبابيب الأرض .. هى أول مرة والا آخر
مرة ؟ وبعدين إنت قلقانة على ليه ؟ أول بنت
أبور فى العيلة ؟ والا اللى إتجوزوا قبل منى
متهنين ؟
أمينة : الجواز شقا مكتوب ولازم نقبلوه .. مش
سبحانه وتعالى قال الشقا مكتوب ؟

حكمت : (تضحك بعفرتة) بجد والنبي ؟ ربنا قال

كده ؟ فين ؟

أمينة : أمشى يابت أحسن زرايبنى حتطلع عليكى ..

سامعة ؟ عارفة حتعملى إيه دلوقتى ؟

السفرة .. الصينية تصبنيها وتشطفها

وتمسحها كويس بفوطة المطبخ الجديدة ..

سمعتى ؟ الصينية الحمرا ..

(تخرج حكمت فى هدوء)

من يوم ما مات المرحوم أبوها وأنا فى حوسة..

بأكبر فى اليوم سنة .. خلاص .. أنا أمينة ؟

البتت اللي كات فى عز شبابها يوم ما مات ..

وياما لبست وياما قلعت .. بقت كركوية ..

وشئى بقى عجورة .. فينك يا أمينة وفين جمالك

لما كنتى توقفى السوق البحرى على رجل .. من

أول ما أخرج م البيت وعينين الناس تتشعلق

فى .. الصغير قبل الكبير ..

(أغنية فى الخلفية : يا خاتمة من باب

الحمام)

والراديو اللي فى قهوة باشا يعلّوه والناس

تفتح الشبابيك وعربيات المنص والقاون تقف

على جنب ! وإيه .. لا عمرى حطيت أحمر

ولا أخضر .. ولا عمرى قصرت الملاية اللف عن

كعب رجلى الشمال .. ولا خد واحد كان يبان
لكن إيه .. كنت أسمع كلام زى الشهد
الصافى .. مش زى كلام النهاردة ..
(أغنية إيه الأساتوك ده إيه اللي ماشى
يتوك ده)

ويوم ما إتجوزت .. أبويا قال لازم تيجى
بنفسها تشوف العريس وتوافق .. ولازم
العريس يشوفها .. مش زى الناس بتوع
زمان .. وياسلام ع النظرة التي طقت من عين
إبراهيم .. يا لهوى يا خرابى ! أبوه قعد يكح
اللّه يرحمه ومسك إيده جامد وقال له « ولد !
إحنا شاريين براحتنا .. وَمَنْ يَخْطُبِ الحَسَنَاءَ
لَمْ يُغْلِهِ المَهْرُ ! » أخت إبراهيم الست لواحظ
اللّه يرحمها وشها بقى حته لمونة .. شفقتها وأنا
راجعة للحريم ماسكة فى عمود السرير خايفة
تقع من الدوخة .. اللّه يرحمها كات حتاكلها
الغيرة .. بنات الجيران قالوا لها مبروك عليكم
العروسة .. قالتهم تاخدوهاش وتريحونا ؟ هو
أنا والنبي كنت تعبته فى إيه ؟ غير هى بس
الغيرة والغلّ اللّلى كان حيطق من عينيها ..
والنبي لولا ربنا محرم الكلام على الأموات
لكنت قلت وفسرت .. إلا ربنا محرمه .. ولو
مش محرمه كنت قلت بتعمل فى وشها إيه

عشان يبقى له لون .. وعطت قد إيه لفتحية
عشان تربط لها الغلبان أبو إسماعين .. أهو ده
حرام يا فتحية ياختى .. الراجل ما استحملش
فى إيدها سبع سنين .. نشفته ومصته لما بقى
زى عود القصب ! هو أنا أنسى لما جيت أرمى
له فوطه - الله يرحمه - قامت خدته ووقعت به
على الأرض ! البت نورة الكبيرة كات فى
المدرسة وهنه عند الخياطة فى الدرس ..
وعزيزة فى الفرن بتخبز .. تمام .. وكات
مقصوفة الرقبة حكمت بتتنط زى العفاريات
حوالى راحت مسرخرة « ماما وقعت عمى !
ماما مؤتت عمى ! » وما خلصتش من لواحظ
ولسان لواحظ ..

حكمت : (داخله فى هدوء) مافيش حاجة ناقصة يا

ماما .. ممكن أروح ألبس بقى ؟

أمينة : تلبسى يعنى إيه ؟ ما إنتى لابسه أهه !

حكمت : لأ عشان ست فتحية ..

أمينة : أمنت بيك يارب ! وهى فتحية ما لها ومالك يا

بنت أنتى ؟ تكونيش عايزاها تجيب لك عريس ؟

حكمت : فشر ! هوانا بايرة بصحيح والا بايرة ؟ ست

فتحية دى للبائرين ! أما أنا فألف من يتمنانى !

تليفون لهنة الخياطة وان شا الله ماتخلصيش

م العرسان وقرف العرسان ! هيه - أتكلم

بالتليفون ؟

أمينة : أستغفر الله العظيم .. أنا خلفت مورستان ..
وبعدين معاكى يا حكمت يا حبيبتي ؟ إنت
لابسة فستان محترم وشيك ويشرف كل بنت
فى سنك ..

حكمت : كنت عايزة ألبس الفستان الأسود الشيك أبو
رقبة ..

أمينة : حكمت يابنتى .. أنتى عارفة أحنا مكلفينه كام ؟
عارفة إحنا بنجيب الفلوس دى ازاي؟ موش
عارفة أحنا عايشين ازاي ؟

حكمت : (تبكى فى صمت) حقك على ياماما .. والله
ما كان قصدى ازعلك .. كان بس نفسى حد
تانى يشوفه على ويقول لى رأيه .. زى ما يكون
بروفة ..

أمينة : يعنى موش حتاكلى بيه؟ موش ممكن توقعى
دمعة والا ملوخية ع القطيفة ؟ عارفة الدهون
بتعمل إيه فى القماش اللي م النوع ده ؟ دانا
شارية له كلفة بس بتلاته وعشرين جنيه ..

حكمت : (تمسح دموعها) خلاص .. حقك على
ياماما ..

أمينة : (تحتضنها وتقبلها) أنا شلت حملكو كلكو
من يوم ما بوكى ما توفى .. بنات .. البنات
فى بلدنا زى النابت .. ما ياخدوش غير غلوة
واحدة ..

حكمت : ما انتى جوزتيهم والحمد لله ياماما..
أمينة : ألف حمد وشكر .. هو لولا سمعة أبوكى الله
يرحمه .. وأخلاقه العظيمة كات العرسان
هجمت علينا كده ؟ والحمد لله أهو ساب لنا
قرشين فى البنك بأسامينا والذهب اللى حوشته
من خيره .

حكمت : اللى اتسرق ؟
أمينة : ما تقوليش اتسرق .. قولى أنه ضاع .. ما
حدش غريب دخل بيتنا .. والذهب موجود إن
شاء الله ..

(يسمع طرق على الباب الخارجى)
حكمت : لازم فتحية هانم وصلت ..
أمينة : شوفيهها معاها كام واحدة ؟
حكمت : (تنظر من ثقب فى الحائط) واحدة كمان ..
يعنى هم إثنين ..
أمينة : عال .. يامننت كريم يارب .. أجرى إنت
بقى (بصوت عال) أهلاً وسهلاً .. ثانية واحدة
وأشد السقطة ..

حكمت : (هامسة) أقطع الفرخة ست حنت زى كل
مرة ؟
أمينة : لا يا عبيطة .. سيببها بذاتها ما دام إحنا أربعة
بس .. (بصوت عال) يا أهلاً وسهلاً .. الدنيا
نورت يا ألف مرحبة ومرحبة ..

(تدخل فتحية وهى ريفية تلبس ملساً
فضفاضاً وتحته فستان شيك ومعها

صبيتها)

فتحية : اللهم صلى ع النبي المختار .. إلهى بارك دى
الدار ..

أمينة : (تقبلها) شرفتوا وأنستوا .. إتفضلوا ..
إتفضلوا ..

فتحية : بقى لى سنين ما جيتكيش من يوم المرحوم -
حسرة على شبابه

أمينة : الله يرحمه ويحسن إليه .. ما بقاش فيه منه
خلاص ياست فتحية ..

فتحية : خلاص ياختى خلاص .. الخير نشف م الدنيا
أمينة : ودى مين الأمور اللى معاكى دى ياست

الستات ؟

فتحية : دى فرحانة صبيتى .. هى اللى بتشتري
الحاجات المطلوبة .. صغيرة وحركة عنى ..

أمينة : هو إنتى ياختى كبرتى يوم واحد فى السنين
دى كلها ؟ ! دانتى صغرتى ! كنت حاسألك

بتعمللى إيه عشان تبقى شباب وبعدين
إفتكرت !

فتحية : (تضحك فى خبث) مين ؟ إخوانا ؟ لا ..
وأنا أستجري أطلب حاجة لنفسى ؟

فرحانة : اللى تطلب حاجة لروحها يخنقوها طوالى ..
تانى ليلة ..

أمنية : باسم الله الحفيظ .. وده ليه الشر ده ؟
فتحية : ولا شر ولا حاجة .. ما هو الشئ اللي بتعملوه
ده لازم يكون لوجه الله ..
فرحانة : وكل ملهم ينصرف لازم يكون حلال .. ولوجه
الله ..
فتحية : خدى ياختى شيلى الملس ده لايتكرمش ! وانتى
يا فرحانة اديها الباطور !
أمنية : (تحمل الملابس وتنادى : حكمت)
حكمت ..
حكمت : (داخله) سلامو عليكم (يتبادلون
القبلات)
أمنية : حكمت بنتى .. خدى يا شاطرة علقى دول ..
وياالله بينا على أودة السفرة أحسن الهوانم
تلاقىهم حيموتوا م التعب والجوع ..
(تخرج حكمت)
فتحية : على إيه أكل وشرب ياختى .. ياما أكلنا ويااما
شربنا ..
أمنية : لا والنبي ما يمكن أبداً .. هو إحنا يعنى عاملين
الرومى .. أهو على ما قُسم من أكل البيت ..
فتحية : طب تقولى لى إيه العبارة أول ؟
أمنية : أستغفر الله العظيم .. والله ماكنت ناوية أجيب
سيرة ولا أفتح بقى .. لكن نعملوا إيه ؟
القرشين اللي راكنينهم للزمن طاروا ..

فتحية : اتسرقت منك فلوس ؟
أمينة : أبدأ مافيش سرقة ولا حاجة .. دا شوية الذهب
اللى كنت شايلاهم فى الدولار وبابيع منهم كل
شوية لزوم الحاجة .. زى ما تقولى وقعوا ..
منطورين .. مش عارفة ..
فتحية : هاتى يابت الصرة ..
فرحانة : (تقدم إليها صرة كبيرة) أفتحها يا
معلمتى ؟
فتحية : إنتى متوضية ؟ (تومئ) خلاص ..
افتحيها ..
فرحانة : (وهى تفتحها) بسم الله الرحمن الرحيم ..
فتحية : (لأمينة) هاتى إيدك اليمين .. قولى بسم الله
الله أكبر ثلاث مرات فى سرك .. وبعدين حطى
إيدك بشويش فى الصرة .. وأول حاجة
تمسكيها طلعيها .. وربنا عليه الباقي ..
(إضاءة - نفس المشهد)
فرحانة : (هامسة) والنبي ما كنت عايزة أعدى بالليل
كده ..
أمينة : دانتي تشرفى فى أى وقت يا حبيبتي .. خير ..
فرحانة : بس عايزه أتر والنبي منك .. أى حاجة ..
أمينة : أى حاجة زى إيه ؟ شعر ؟
فرحانة : شعرتين يبقوا رضا ..

أمينة : (تقوم وتحضر مقصاً وتقص خصلة
تضعها فى منديل فى يد فرحانة) كفاية ؟
فرحانة : نعمة من عند ربنا ..
أمينة : أعمل لك كوباية شاي بالليمون تروق الدم ؟
فرحانة : (وهى تنهض) لا والنبي ما انتى تابعة
نفسك .. أصلى ما أقدرش أتأخر .. الأسىاد
طلباتهم كثيرة والواحدة مش ملاحقة ..
أمينة : اشمعنى المرة دى يا فرحانة يا بنتى .. ؟
فرحانة : أصل إنتى لا مؤاخذه فيكى حياة جديدة .. ولاد
يعنى ..
أمينة : (فى صدمة) يانهار موش فايت ! قصدك
حأحب وأولد ؟
فرحانة : اللى مكتوب مكتوب بقى يا عمتى .. نعملوا
إيه ؟!
أمينة : طب وده يدايق الأسىاد فى إيه ؟
فرحانة : ماتأخذنيش يا عمتى فيه حاجات ماقدرش
أقولها .. لكن هى مش مدايقة ولا حاجة .. كل
ما فى الموضوع ان الصغيرة اللى زيك بيخش
عليها الصغيرين ويتخانقوا عليها .. واحنا فين
وفين على مانراضيهم ..
أمينة : (فى حالة ذهول) وأنا مالى ومالهم ياختى
بسم الله الحفيظ .. هو أنا حاناسبهم والا
حناسبهم ؟ (ترتعد) .

فرحانة : ما أقصدش .. أقصد أن الطلبات بتزيد وإحنا

مانحبش نزعل حد ..

أمينة : يا ريتنا مارحنا لهم ..

فرحانة : ليه بقى ؟ دا أن شاء الله بيجى منها كل خير ..

(هامة) وللأمورة حكمت .. كنا عايزين

نخبها عليهم لكن مافيش فائدة .. الخير لما

يعم يعم بقى .. فتك بعافية .. ميعادنا بكرة

بإذن واحد أحد .. (تخرج)

أمينة : (وحدها) يا ترى انت فين يا إبراهيم

دلوقتي؟ قريب وإلا بعيد ؟ الله يجازى الذهب

وسنين الذهب .. ما كنا مستريحين وكافيين

خيرنا شرنا .. دلوقتي الله أعلم حندفعوا كام

للست فتحية .. ويمكن تقول فيه عمل معمول

ويتكلف فلوس على مانطلعوه .. والا تطلب

زار .. كان إيه اللي دخلنا فى الحاجات دى ؟

ماحنا عايشين على قد حالنا وربنا ساترنا

والحمد لله ! شوف ياخويا كلام البت فرحانة ..

قال صغيرة آل ؟ صغيرة ؟ أينعم صغيرة ..

اتجوزت قبل ما أتم الستاشر إفرنجى ..

جوزونى عربى عشان كنت فائرة وفارعة ..

يا عيني عليك يا إبراهيم وإنت موش طابق

نفسك م الفرحة والدموع مالية عينيك ! كان

يسيب الدكانة الضهر عشان يصلى فى

الجامع .. كان يقول الصلا فى الجامع ثوابها

أكثر ٢٧ مرة من صلاة البيت .. (تضحك
فى شقاوة) وبعدين بدال ما يروح الجامع
ألاقيه قدامى فى الصلاة .. إيه يا إبراهيم خير ؟
أبدأ بس حاتوضا .. تعالى كى لى ميه سخنة
لوسمحتى .. سيبنى يا إبراهيم أنا عندى طبيخ
وغسيل وتنظيف وأنا لوحدى .. قومى يا
حبيبتى خمس دقائق .. وبعدين معاك
يا إبراهيم ؟ الزباين اشتكوا لأبوه من قفل الدكان
وزارنا أبوه الله يرحمه وقعد يزقق له وأنا
عاملة مش سامعة - قفلوا عليهم الباب !
(تهمس) قال يقول له هو أنت أحسن من
عبدالله بن أبى بكر ؟ وإبراهيم يقول له مابوه
سمح له يرجعها ! قمت سألت قالوا لى معناه
إنه يطلقك .. قلت يادى الحوسة .. ودى مين
دى اللي شغلت الناس الطيبين بتوع زمان
دول .. قالوا لى دى عاتكة .. سألت الشيخ فى
الجامع فى درس الأربع .. قال لى دى اتجوزت
الزبير بن العوام وبعديه عبدالله وبعديه عمر
وبعديه الحسين .. وكلهم اتقتلوا .. قلت له
يا ساتر .. دى شوؤم .. قال لى لا .. اوعى
تقولى كلام من ده .. إنتى ماتعرفيش الخير
فين ! ودى كان عندها كام سنة .. قال لى علمه
عند ربى .. بعد الدرس جريت وراه عشان يقول
لى قال اتقى الله ياولية فى جوزك .. وسابنى

زى اللى خايف منى ! هو أنا كنت حاكلكه ؟
والنبي دا كنت بأعمل لإبراهيم الصوانى اللى
بتبك سمن .. والفطير المسأسأ اللى اللقمة منه
تمشّى بابور .. كان ساعات يصرخ ويقول لى
الشأى يا أمينة .. الشأى بسرعة .. الله
يرحمه .. إخوانه كانوا بيحسدوه عشان ربنا
فاتح عليه .. لكن الفتوح من عند الله .. كان
دايمأ يقول لى لو كنا نجيبوا ولد ياخذ باله منك
بعد ما أموت .. أقوله كلام إيه ده ؟ دا البنات
رزقهم واسع .. إنت كنت تحلم بالعز ده كله
يابراهيم ؟ ده رزق العفارىت البنات .. كل سنة
كات تجيلنا عفريته جديدة .. كنت لسة بأرضع
ولاقى نفسى .. هب .. أقول الحمد لله ..

(تدخل فرحانة لاهثة بعد طرق عنيف)

على الباب)

فرحانة : سامحينى ياست أمينة .. للضرورة أحكام ..
صدقى بالله أنا جاية جرى من عند الست
فتحية خايفة تكونوا نمتوا .. أنا سلمت كل
حاجة وعملت المطلوب وجيت أمشى سمعت
الست فتحية بتكلم حد .. بسم الله الرحمن
الرحيم .. زى اللى بيستفهم منها على حكمت
والست أمينة .. مش ع الذهب .. لا .. عليهم ..
وفهمت منها (تضحك) يعنى

أمينة : إيه ؟ لقت الذهب ؟
فرحانة : أنا بقول عليكو .. مش ع الذهب !
أمينة : أنا اتبرجلت .. أنا ماعدتش فاهمة ..
فرحانة : فيه أخبار حلوة .. بس ليّ الحلاوة .. الحلاوة
دى مالهاش دعوة بالأسياذ .. والنبي ما لها
دعوة .. أنا لسه مسلماتها الديك الهندي أبو
عُرف بمبى ومكمل السنة إمبارح .. بتحطى
إيدك فى جيبك ليه ؟ طب وحياة من كتب لك
السعد يا حكمت يا بنت أمينة المعدادوية ..
وحياة -
أمينة : يا بنتى أنا بأطلع منديل ..
فرحانة : اسألها .. ومسلماها العشرين قشرة بندقة
اللى مكسرهم السنجاى الرمادى بنفسه -
وعداهم لها واحدة واحدة .. عشرين ..
لأنقصوا ولا زادوا .. عشرين .. إنتى بتحطى
إيدك فى جيبك ليه ؟ !
أمينة : يا فرحانة يا بنتى ماقصديش ..
فرحانة : ولسه مسلماتها سبع شعرات من ديل تعلق
أعرج .. طول بعض وقد بعض وإذا برمتيهم
ينفتلوا ويسرخوا سرخة تعبان ..
أمينة : بسم الله الحفيظ ..
فرحانة : (هامة بجدية) خللى حكمت تلبس وتزوق
بكرة .. فتك بعافية ..

(تجرى خارجة)

إسلام

(يضاء المسرح - نهائياً - الواضح أنه

الصباح)

أمينة : (وحدها) يا ترى رحلتى فى يا حكمت ..

خاففة ييجوا ما يلاقوهاش .. مش مهم ..

العرسان كثير - والبنت صغيرة وحلوة ولو أنها

طالعة سمرا لايوها .. كل إخوانها طالعين لى ..

بسم الله ما شاء الله .. خصوصاً البنت هنت ..

سميناها على اسم الخياطة .. وطلعت أشر

منها .. بتفكرنى بنفسى لما كنت صغيرة ..

قصدي قبل ما اتحاش .. كان عندي اتناشر

والا تلتاشر سنة .. مضبوط .. مرة معدية من

عند وكالة السردين اللى ع البحر ، ولفيت

أتفرج على البتة الكبيرة اللى حاطين فيها

الصيد وسرحت فى المية لحد ماخرجت م

الناحية الثانية وإذا قدامى ولد بسم الله ما شاء

الله ! قمر ١٤ .. لابس لاسة جديدة حتاكل من

حاجبه حنة .. وجلبية واسعة الهوا بيلعب بيها

ومركون على عصاية .. لا .. شومة أصلى من

اللى الصعايدة بيبيعوهم فى سوق العيد ..

لقيته فى وشى على طول يمكن مافيش مترين ..

اتخضيت قلت بسم الله الرحمن الرحيم ..

واتسمرت فى مكانى .. قال لى بصوت واطى
خلىّ جسمى يقشعر : إنت بتعملى إيه هنا
يا شاطرة ؟ إنت ما تعرفيش إن المنطقة خطر ؟
واتبرجلت شوية وقلت له خطر ازاي ؟ قام
شاووع المية وقال انتى ماسمعتيش على
عروسة البحر ؟ هى دؤامة فى الحقيقة .. بس
الناس هنا ييسموها عروسة البحر عشان
بتشد اللى يقرب منها وتغرقه .. تعالى
يا شاطرة .. ماتخافيش .. أنا إسمى عمران
وباروح المدرسة الصبح وباجى هنا كل يوم بعد
الضهر .. لو ربنا بيحبك يكتب لك تشوفى
غروب الشمس هنا .. حاجة جميلة صحيح !
إنتى بتروحي المدرسة ؟ ولقيت لسانى معقود
لانا عارفة اتكلم ولا عارفة أسكت .. بقى مفتوح
لكن مافيش صوت طالع منه .. تعالى
يا شاطرة .. ومد إيده الشمال - غصبن عنى
ضحكت وقلت له إنت شطلاوى ؟ ضحك وقال
أجدع ناس .. الشطلاوى بيفكر بنص عقله
اليمين .. ومشينا سوا ع البحر لحد الشارع .
مين يوميهها بأحلم بيه كل يوم .. حتى بعد ما
إتجوزت .. شوف كام سنة .. أشوف لاسته
الجديدة والشومة الصعدي واتنهد .. وكثير
وأنا معدية من حلقة السمك كنت أهدى فى

سكّتى يمكن أشوفه .. وكان بيتهياً لى انه
واقف برة البيت يستنى أكله وإلا أناديله حتى
بعد ما إتجوزت .. كنت أقضى لىالى صاحبة
جنب إبراهيم للصبح .. وبعد ربنا ما ريحه ..
كنت أشوف وش عمران فى الشباك بيتهز مع
فروع الشجر فى لىالى القمر ..

(حكمت تدخل من باب الشارع)

حكمت : بتكلمى نفسك يا ماما ؟

أمينة : كنتى فىن يا هانم ؟ ممكن أعرف ؟

حكمت : كنت باتمشى !

أمينة : نعم ؟ أفندم ؟

حكمت : أيوه .. طبعاً .. تقاليد البيت .. ماحدش

يتمشى .. ماحدش يتفسح .. الواحد يشتغل

ويس لحد ما يموت ..

أمينة : يا بنتى إحنا منتظرين ضيوف ..

حكمت : جات لك الفرصة تتخلص منى ! جات لك

الفرصة تستفردى بالبيت ..

أمينة : أتخلص منك ، إيه الكلام ده يا حكمت

ياحبيبتى ؟

حكمت : سمعت وعرفت ! جايين لى عريس النهارده !

أمينة : وإفرضى يا حكمت ؟ حد يكره ؟ هم إخوانك

اشتكوا ؟ ما هم الحمد لله فى أحسن حال ؟

حكمت : طب وافرضى إنه -

أمينة : (مقاطعة) ما حدث يقدر يغصبك

يا حبيبتي .. هو إحنا غصبنا إخوانك ؟ ياما
قرينا عن الحب والجواز .. ياما قالولنا ان ده
حاجة وده حاجة .. وأهلنا كانوا بيقبلوا
النصيب من غير ما يفتحوا بقهم ..

حكمت : وكانوا بياخدوا على دماغهم !

أمينة : مش كلهم يا أمينة .. ياما انسعدوا
وانسطوا ..

حكمت : ماما يا حبيبتي .. أنا لازم أقول لك أنا مش
عايزة أتجوز دلوقتي ليه ؟ ..

أمينة : هو سر يا حكمت ؟ (تضحك) حتعملهم على
يابت ؟

حكمت : أنا عارفة يا ماما إنتى تعبتى قد إيه .. قاسيتى
قد إيه .. وإنتى بتمثللى على الناس إنك
سعيدة .. أنا عارفة عيلة أبويا كات مدوخاكي
قد إيه .. وأبويا نفسه الله يرحمه ماكانش
دبلوماسى زى ما بيقولوا .. طلباته ماكانش
بتنتهى .. ومصاريفه كات على نفسه أولاً ..

أمينة : أبوكى كان زين الرجال ..

حكمت : أيوه يا ماما .. لكن على نفسه .. جالكيش فى
يوم وقال لك تعالى نسافروا نتفسحوا .. حتى
لحد اسكندرية نزوروا العيلة ؟ دخلش عليكى
يوم بحتة قماشة وقالك خدى يا أمينة .. إعملى

لك فستان جديد ؟ مافيش يوم قالك إنتى تعبتى
م الولاد وخدمتهم .. استريحى النهاردة وأنا
حاجيلكم أكل جاهز ؟ مافيش يوم - ماما ..
إنتى بتعيطى .. حقك على .. ماكانش
قصدى ..

أمينة : (تنهته) أبوكى عمل اللى عليه وزيادة .. هو
كان حيجيب منين ؟

حكمت : إنتى فضلتى تقولى كده لحد ما صدقتى
نفسك .. يا حبيبتى يا ماما .. يجيب م الدكان
اللى كان بسم الله ما شاء الله بيدر دهب ..
كان بدال ما بيعت التموين ده كله لعيلته فى
اسكندرية عشان يرضوا عليه .. استغفر الله
العظيم .. يبرأ أسرته .. يبرأ البنات اللى زى
القطط .. فوق روس بعض .. وأمهم فانية
نفسها فوق الماكنة عشان تعيشهم ..

أمينة : بس يا حكمت والنبي .. (تمسح دموعها)
يخليكى تسكتى ..

حكمت : لا يا ماما .. أنا كنت صغيرة صحيح لكن طول
عمرى مفتحة وشايقة الدنيا كويس .. ساب لنا
إيه يا ماما الوالد العزيز ؟ البيت ؟ وارثينه عن
جدى أبو امى ! وإخواتى كل واحدة فاتحة
بيت .. هنة ع الماكنة زى مامتها .. ونورة بتأخذ
ماهيتها م المدرسة وتديها لجوزها .. وعزيرة

الليذة .. ياخى علىكى يازوزو يا طعمة ..
واقفة فى وابور الطحين م الصبح لليل لحاد
الباشا ما يسمح لها تروح ..
أمينة : (تسترجع رباطة جأشها) إحنا مستورين
يا بنتى .. عمرنا مامدينا إيدنا لحد ولا
اتفضحنا قدام حد .. ربنا ساترنا واللى ساتره
رب ما يفضحوش عبد !
حكمت : واهو الحمد لله عندنا ذهب يكفى لحد ما
أتجوز ..
أمينة : الحمد لله ..
حكمت : ودلوقتى الست فتحية توصل ومعها السر
وتكشف لنا مكانه ..
أمينة : أهم على وصول .. يا خبر .. دا الوقت فات
بسرعة ..
حكمت : بس المشكلة إنهم لما يلاقوا مكان الذهب يا
ماما .. موش حيلاقوا الذهب ..
أمينة : دى فتحية - ليه - ليه بقى ؟
حكمت : لأنه مافيش ذهب يا ماما ..
أمينة : مافيش ازاي ؟ دا منظور بس هنا والا هنا ..
إحنا ماحدش غريب دخل بيتنا .
حكمت : لأن إحنا بعناه حنة حنة عشان نعيش -
(صمت) وآخر حنة كات من شهر .. ويعدين
قلبنا الأوضة ونضفنا الدولاب عشان تضيع
الشكجية ..

أمينة : (فى استماتة) فتحية زمانها جاية .. وإن

شاء الله حتطلع الذهب ..

حكمت : (تصرخ) مافيش ذهب يا ماما .. ما بقاش

عندنا ذهب ..

أمينة : حكمت ! إنتى بتزعقى لى .. إنتى بتشخطى فى

أمك ؟

حكمت : (منهارة) لا يا ماما .. حقك على ..

ماتزعلش منى .. (تقبلها وتصالحها) أنا

حاضر البن المحوج للضيوف .. يمكن بييجى

حد يحب أقدم له فنجان قهوة والا حاجة !

أمينة : (تغتصب ابتسامه) فنجان قهوة ! وماله ..

واسمعى .. إليسى فستانك الجديد .. ده يومه

يا حكمت .. وسرحى شعرك كويس وبعدين

غطيه .. وخدى .. حطى نقطة م القزازة دى هنا

وهنا .. دى ريحة مسك وعنبر .. واسمعى ..

إمسحى الكحل المبرطش ده وحطى كحل

جديد ..

حكمت : وإيه كمان يا ماما ؟ (تبتسم فى حب) ألبس

كعب عالى ؟

أمينة : اوعى !

حكمت : (تضحك فى شقاوة) مانا عارفة بس

باغيظك .. (تجرى خارجة)

أمينة : أوضب نفسى أنا كمان ! لكن على إيه ؟

الجماعة عارفينى وجوز بنتى مش حيبص لى !

فى لبس البيت ده زى ما أكون رجعت بنوتة
تانى .. مش ناقصنى غير الضفاير بتوع
المدرسة .. قبل ماتحاش ! وأمى الله يرحمها
تفعد تزوق فيهم بشرائط حرير ألوان ! وأنزل
أتمشى ع البحر ع المغربية كده وأنفجر على
الحلقة وكل بتيّة وبتيّة .. والمية الهادية عند
مصانع الطوب .. والنخلتين الللى طالعين من
بعض .. بنت وأمها .. يا روجى يا روجى .. بس
يا ترى دول بيطرحوا بلح ؟

(يسمع طرق على الباب)

أيوه أيوه ! يوه ياخواتى شوف أنا رحت فين !
حاضر حاضر ..
جايه على طول .. حاشد السقطة أهه ..
اتفضلوا .. يا ألف مرحبة ..

(تدخل فتحية وفرحانة وعمران)

أهلاً وسهلاً .. اتفضلوا ..
فتحية : أنا فى ميعادى تمام .. انتو الللى موش جاهزين
بقى .. (تضحك) مش عوايدكم ؟
أمينة : هيه .. طمنينى .. لقيتى الذهب والا لا ؟
فتحية : أمينة هانم .. إنتى ست أميرة ومكتوب لك
السعد ..
فرحانة : والنبي قلبى إنفتح لها خالص ..
أمينة : والذهب ياست فتحية ..

فتحية : جنأى لك فى الكلام .. بعد فرحانة ما جابت
الحاجة .. عملت البخور والعقدة والذى منه
للأسياذ .. وما فيش ثوانى إلا والخبر كان فى
إيدى ..

أمينة : خير ؟

فتحية : الذهب ثلاث حنت .. عدى البحر من ثلاث
ليالى .. واتصلى عليه ثلاث مغارب ..

أمينة : وده معنته إيه ياست فتحية ؟

فتحية : إنه ما يقدرش يرجع إلا إذا عدى على مية ..

فرحانة : قصدها على جوازة ..

فتحية : أنا قلت للوكيل - بسم الله الرحمن الرحيم -

وأنا مالى وما للجواز بس ؟ قال لى ولا يكون

فى بالك .. هو خلص من هنا وبصيت لقيته

قدامى من هنا ..

أمينة : الذهب !

فتحية : لا .. عمران !

(تذهل عندما تسمع الاسم ويتبادلان

النظرات)

فرحانة : كملى ياست فتحية ..

فتحية : قبل ما افتح بقى لقيت اللى بيقول لى خدى

الذهب وديـه لصاحبه ..

أمينة : (فى حالة اضطراب عاطفى شديد)

وجبتيه معاكى ؟

فتحية : ماهه !
أمينة : سى عمران معاه الذهب ؟
فتحية : لا .. هوّ الذهب !
أمينة : (تنادى) حكمت .. حكمت ! فهمت .. يعنى
الجواز الأول وبعدين الذهب .. (تصرخ)
حكمت ! حكمت !
فتحية : إنت عايزة إيه من حكمت ؟
أمينة : تشوف العريس !
فتحية : وهى دخلها إيه ؟ العريس جاى لك إنتى ..
أمينة : (فى إنهيار) سى عمران ؟ (دموع) بعد
السنين دى كلها ..
عمران : وبعد ألف سنة .. دايماً فى خيالى .. البنت أم
ضفاير .. اللى تاهت على شط النيل ..
أمينة : (تنهض فى منتهى الخجل وتعيد ترتيب
ملابسها) وأنا بلبس البيت ياسى عمران ..
يادى الكسوف ..
عمران : دا اللى مكتوب لنا ياست أمينة .. لا كان فى
بالى ولا فى خيالى .. أرجوك .. ما تردنيش
مجروح ..
أمينة : طب والذهب ياست فتحية ؟
فتحية : أهو ده اللى الأسياذ بعتوه ..
أمينة : يعنى الذهب راح ؟
(تدخل حكمت بصينية القهوة)

حكمت : اتفضلوا - قهوة محوجة .. فين العريس ؟
أمينة : فين الذهب ؟
فتحية : ياست أمينة أفهميني ..
أمينة : لا افهمك ولا تفهميني .. ست نصابة جاية تعملهم على ..
حكمت : هو مش العريس والا إيه ؟ تشرب قهوة يا أخ ؟
عمران : حكمت .. أرجوكي فهمي ماما يا بنتي أن أنا بحبها حب عبادة .. من يوم ما رجعت م السفر وهى فى خيالى .. ياترى إنتى فين يا أمينة ؟
كات زى الحلم .. وعملت المستحيل وفتحية تشهد .. وفرحانة وأهل البر التانى كلهم ..
أمينة : كده كده .. ياخسارة .. ماكانش أملى يا فتحية .. يهون عليكى الولايا تلطشى دهبهم ؟ .. إحنا اللى مالناش غير ربنا ..
الذهب اللى شريته بعرق جبيني .. بقعدتى ع الماكنة ليل ونهار لحد ما عملت نضارة وشكلى بقى كركوبة ..
عمران : أنت الجمال اللى عمره ما يتغير يا أمينة يا حبيبتي .. عارفة لو عملتى شعرك ضفاير ترجعى طفلة زى زمان .. وأصغر من بنتك ..
حكمت : سيب بنتها فى حالها أحسن والله العظيم -
فتحية : يا خوانا روقوا واتهدوا بالله .. إحنا قدامنا جوازة بمليون جنيه ..

فرحانة : نتوكل على الله ؟

أمينة : كان زمان يامرجانة .. قصدى يا فرحانة ..
الذهب ضمان ان البيت ده يفضل مفتوح قدام
البنات اللى انكتب عليهم الشقا هم كمان ..
ولحد ما القردة دى تتجوز ..

عمران : خلاص .. واللى يجيب لك الذهب بتاعك ؟

أمينة : شوف يا عمران .. من كان سنة كان يبقى
جميل .. كان يبقى حلم وإتحقق .. لكن إحنا
كبرنا واتغيرنا .. لو اشتريبت لى ذهب الأرض
كله موش ممكن يعوضنى عن ذهب ماكينة
الخيطة الغلبانة بتاعتى .. اللى كل ذرة فيه
تساوى تعب أيام وسهر لياالى ..

عمران : النهاردة زى إمبراح يامدام أمينة صدقيني ..
واللى راح يتعوّض ..

أمينة : اللى راح راح يا عمران ياخويا .. إحنا ناس
انكتب عليها الشقا .. أنا وبناتى الأربعة مع
بعض .. تفتكر لما نتجوز ونعيش لياالى سعيدة
أنا وإنت لوحدينا ..

حكمت : قصدك بعد ما أتجوز أنا كمان ..

أمينة : تفتكر لو اتجوزنا وبدأنا حياة جديدة يظللها
الهناء - على رأى كتاب النصوص - حنكون
سعداء بحق ؟

حكمت : وترفرف عليها أجنحة السلام ؟

عمران : ليه لا ؟ إحنا لسه شباب وقدامنا -
أمينة : وورانا أسر كبيرة .. أنا وأربعة فى عين العدو
خمسة .. حيحتاجولى وأحتاج لهم طول مافينا
نفس .. صدقنى يا عمران .. إحنا بلد صغيرة
ومافيش حاجة بتستخبي على حد .. خصوصاً
على ستات البيوت الحلوين .. مش كده ياست
فتحية ؟ (صمت) تفتكر إنك بعد ما تحقق
حلمك معاى يمكن تخلف من جديد .. حتنسى
الحاجة سنية وعيالك اللي فى المدرسة ؟
حيهون عليك بقلبك الحنون ونفسك الطيبة و ..
أقول إيه ؟ وشهامتك ورجولتك .. حيهون عليك
تسيب مراتك الأولانية .. أم عيالك .. تتبهل فى
الدنيا .. ما تبقاش عمران لوده حصل .. ولأنا
أبقى أمينة .. لا يا عمران .. أسوار كثيرة اتبنت
بيننا .. وماعادش فى إيدى ولا إيدك نهدها ..
فتحية : ما تصلّى ع النبی ياست أمينة آمال ونقروا
الفتحة وإحنا فى حموتها ..
فرحانة : يا لله والنبي عشان نفرحوا بيكو ..
أمينة : والست مرجانة .. قصدى فرحانة عايزة تفرح !
ماحنا فرحنا كتير وضحكنا كتير وقلوبنا
بتبكي .. إنت لسه ماشلتيش الهم .. لكن
مسيرك تعرفى معنى الدنيا يا فرحانة .. لما
اتنين من بناتك يبقوا عيانيين وتجسيهم تلاقىهم

زى النار .. ولا عارفة تجيبى دكتور ولا
تمورجى .. ولا عارفة تسألنى حد تعملنى إيه ..
وأهل جوزك نسوكى إنتى وعيالك .. ربنا
يسامحهم .. وتيجى تحطى رأسك ع المخذة
تسمعى واحدة بتقول أه يا ماما تفزى زى اللى
لسعك عقرب وتنزلى زى ما إنتى بالملاية اللف
على بيت الأجزاءنجى الدكتور موريس الله
يبارك له - يقوم جاى معاكى بنفسه يديهم حقن
ويعلمك ازاي تعملى كمادات باردة للحرارة ..

حكمت : أنا عمرى ماعيتت ..

عمران : ننسى أيام الشقا بقى ..

أمينة : حنقدر يا عمران ؟ إن كنت إنت حنقدر .. أنا
موش حاقدر .. ومادام عرفت الرد بتاعى على
طلبك .. يستحسن برضه أقول الحقيقة للست
فتحية وما اتعبهاش معاى .. ونوفر على
فرحانة مشاوير الديك الهندى وقشر البندق
وشعر ديك الثعلب .. (صمت) تحبوا تسمعوا
والا كفاية كده ؟ (صمت) أنا ماضاعش منى
دهب ! وان شاء الله كل اللى كنت راهناه عند
الخواجه هارون حارجعه بعد كام يوم .. هنة
بنتى فتحت سكة الماكينة تانى والحمد لله ..
بأعمل لها أنا التسريج والزراير والكُسر وبقية
شغل الصنایعية .. والحمد لله أيدها فى القطع

زى السحر والناس عليها طوابير .. أنا اللي
حأرجع الذهب بتاعى ياعمران .. مش الشاطر
حسن ..

فتحية : كنا بالمرة ..

أمينة : مافيش بالمرة .. إحنا نشكركم على تعبكم معنا
وربنا يقدّرنا ونكافئكم .. والنهاردة حكمت بنتى
طلبت منى أنها تتفسخ شوية فى البياصة ..
وحتخرجوا فى الحنطور أبو شلم .. مش كده
يا حكمت ؟

حكمت : الله .. الله ! أروح ألبس يا ماما ؟

أمينة : أما نسلّم ع الضيوف الأول .. إنت شرفتونا ..

(ينهضون متناقلين ويخرجون)

مع ألف سلامة .. إبقوا سمّعونا حسّكم .. مع
السلامة ..

حكمت : حنروح البياصة صحيح يا ماما ؟

أمينة : هو شلم كتير عليكى يا قمر ؟ بكره نجيب بدال
الشلم عشرة .. وإيدك دى اللي مكسّلة أنا
حاكسرها إن ما ساعدتنيش .. فاهمة ..

حكمت : ماما .. على فكرة .. أنا بحبك قوى .. أكثر م
الذهب ..

أمينة : وأنا كمان يا أمورة .. ولا تقل الأرض دهب !

(يتعانقان)

إظلام

جه عليه الدور ؟

مسرحية من فصل واحد

(غرفة إنتظار واسعة مثل غرف إنتظار المحاكم
أو المستشفيات أو المدارس أو المصالح الحكومية
مثل مصلحة الشهر العقاري أو إدارة المرور .. الخ -
هنا يجلس الناس صفوفاً على كراسي متراصة ،
ويلبسون ألواناً مختلفة من الثياب وعادة ما ينهمكون
في قراءة شيء ما أو التسلى بالنظر في شيء ما (مثل
لعبة الكترونية) أو أحياناً الحديث الهاس الذي
لا يكاد يبين . من وقت لأخر ينادى صوت في
الميكرفون الداخلي على اسم أحد الموجهين
فينهض ويدخل من أحد الأبواب ثم يختفي . وبعد
ذلك ينادى في الميكرفون على اسم آخر وهكذا .
من اليمين باب الدفول - الواضح أنه من الشارع ،
والى أقصى اليسار باب فحص المتقدمين والواضح
أن هذا الباب يؤدي في النهاية إلى الطريق العام
لأنه لا يعود أحد منه إطلاقاً . على الحوائط لوحات
وصور فوتوغرافية وشهادات تفوق . في الخلفية ، إذا
أراد المخرج ، موسيقى شرقية مستقاة من الأغاني

الشهيرة وهى تستمر دون توقف . أحياناً يدخل موظف
أو إثنان فى هذه المؤسسة ليخاطبا أهد الجالسين .
ثم يخربمان دون بسمة وتبدو عليهم مخايل العنف
والغباء .

(عندما ترتفع الستار يكون المكان مزدحماً ولا
مكان فيه لمزيد من الجلوس يدخل إبراهيم متولى
وهو شاب فى مقتبل العمر يحمل حقيبة ساسوننايت
ويبدو أنه فريج إهدى الجامعات . يبحث عن مكان
يجلس فيه فلا يجد)

(يدور إبراهيم عدة دورات فى المكان ثم يقترب
من أهد الجالسين ويهمس له ببسمة واضحة قيهبه
الأخر فى وجهه)

إبراهيم : معلش ماتزعلش .. عدم المؤاخذه .. أشوف
فى حة ثانية ..

(يقترب من أحد الجالسين)

لو سمحت يا أستاذ .. فيه مكان هنا لواحد ..
لو سمحت ..

الجالس : (لايرد فى البداية . ثم يكشر عن أنيابه)
إيه ؟ فيه إيه ؟

إبراهيم : لو سمحت .. إتأخر شوية .. أصلى تعبان وعاز
استريح !

الجالس : (فى صوت مزمجر) وأنا بقى اللى
حاريحك ؟ ماتغور من قدامى ..

إبراهيم : فيه مكان جنب سيادتك .. لو إتأخرت شوية ..
الجالس : (يستعد للقتال) انت يا جدع انت بتقول
شَكل للبيع ؟ ماشى ! واحنا قدها وقدود ..
(يضع يده فى جيبه) فين قرن الغزال ؟
إبراهيم : يا أستاذ المسألة بسيطة .. بص .. شوف ..
المكان واسع ..

(إلى جاره الآخر)

مش كده يا أستاذ ؟
الجار : إنت بتكلمنى يا جدع إنت ؟ طالب حاجة عايز
حاجة ؟
إبراهيم : ياخوانا نساع بعض عشان نخلص .. كلنا
عندنا مصالح ..

(تنادى فى الميكرفون : رمضان

بسطويسى)

الجالس : أهه ! روح أقعد مطرح رمضان ..
(ينادى الصوت ثانياً : رمضان
بسطويسى .. رمضان بسطويسى ..)

الجار : إنت ما سمعتش يافندى ؟
إبراهيم : مافيش حد قام لسه !
الجالس : إنت ما سمعتش رمضان بسطويسى ؟
إمرأة : ماتروح ياسى رمضان خلينا نخلص .. احنا
دماغنا مفلوكة خلقة ..
إبراهيم : يا ستى أنا مش رمضان

إمرأة : يعنى الجدة يكذب ؟
الجالس : يا أخى حل عنا بقى ! دى مصيبة إيه دى ؟
(يعلن الصوت فى الميكرفون : إمباركة
المراكبى .. امباركة المراكبى)
إمرأة : هم بيقولوا مباركة ياخويا ؟
الجالس : أيوه .. بينادوا على مباركة ..
إمرأة : إلهى يكرمك ويسعدك ويخلى لك ولادك
ولا يحرملك من حد فيهم ..
الجالس : ياستى اتفضللى بقى .. (إلى إبراهيم) يالله
ياسيدى .. فرجت .. روح أقعد مطرحها ..
(تخرج مباركة)
إبراهيم : معلش ولو فيها رذالة .. أصل الحريم
ما يحبوش حد غريب ..
الجالس : يا أخى إنت فلقتنى .. مكان رمضان مش
عاجبك .. مكان مباركة مش عاجبك .. يعنى
هنا فيه سكر ؟
الجار : يافندى إسمع الكلام بقى واخللى النهار
يفوت ..
(يعلن الصوت فى الميكرفون : الشُّضلى
النواوى .. الشُّضلى النواوى ..)
يامنت كريم يارب .. أهو أنا بقى الشُّضلى ..
النواوى

الجالس : (لإبراهيم هامساً) أقعد بسرعة مطرحه ..
ياالله .. أقعد ..

(يخرج الشضلى)

إبراهيم : (وهو يجلس) وبسرعة ليه يا حاج ؟ هو
إحنا بنتسابق على فته ؟

الجالس : (تتغير نظرتة إلى إبراهيم بمجرد أن
جلس) القعد مش بالسهل اليومين دول
ياسيدنا الأفندى .. واللى يروح منه مطرحه لا
مؤاخذه مايعرفش يجيبه تانى أبداً .. إتفضل ..
شايف إمباركة .. أهى رجعت تانى .. بالك
حتعرف تقعد ؟

(إمباركة فى شجار مع جارتها القديمة
التي ترفض جلوسها)

مباركة : أنا موش كنت قاعدة هنا يا جماعة ؟ (لا أحد
يرد) يا ستات .. يا رجالة .. اشهدوا بالحق ..
مش ده مطرحى برضه ؟ (لا أحد يرد) ما
هو شوفى أما أقول لك ياست انتى .. انتى
ياتفسحى شوية .. يا حافضك وسط العالم ..

(همهمة وسط النساء والرجال)

حاقولهم اللى قلتيهولى لما كنا قاعدين سوا ..
والحق حيبان من حصوة لبان !

الجارّة : (فى ذعر) ياست حد قال حاجة .. المكان ده
بتاع أختى ..

مباركة : أختك اللى فى طره وإلا اللى خلفت نسناس ؟

(همهمة وضحك)

الجاره : جرى ياست إنتى أمال ؟ إيه الكلام ده ؟

مباركة : مش إنتى اللى قايلالى إنهم عايزين يشتروه
منها فى جنينة الحوانات ؟

(همهمة وضحك)

إبراهيم : (يحاول ان ينهض ليفض النزاع

فيجلسه الجالس بالقوة) إنتى ياست انتى

كفاية بقى .

الجالس : إنت كنت حتعمل إيه ؟

إبراهيم : أصل الجماعة دول واخد بالك ..

الجالس : كنت حتقوم يعنى ؟

إبراهيم : أوصل لهم بس أشوف -

الجالس : بس .. مطرحك ماتت جركش ! خليكهم هم
يحلوها ..

إبراهيم : أنا موش فاهم ليه المسألة تبقى مشكلة أوى
كده ؟

الجالس : مشكلة ؟ إذا كات عايزة تاخذ مطرحها !

إبراهيم : ما المطارح كتير !

الجالس : يافندى أفهم .. اللى ياخذ مطرح هنا ولو مرة

واحدة يبقى حفظ حقه مدى الحياة .. بمجرد

ماينبسط لا مؤاخذه ع البنش يبقى من حقه ييجى

فى أى وقت وكل وقت لآخر العمر !

إبراهيم : وعلى إيه ده كله .. دى هيه مأمورية صغيرة
وخلص ..

الجالس : قالوا لك كده فى الجواب اللي جالك ؟

إبراهيم : يا أستاذ إحنا لنا أسماء والأسماء مكتوبة فى
قوائم .. واللى الدور عليه بينادوا إسمه
ويخلصوه وننتهى ..

الجالس : أنا بقى حذرتك .. حاكم أنا ابن بلد وعندى
الحكمة كلها .. ساعة ماتقرد ركبك أنا موش
مسئول !

(أثناء الحوار تكون مباركة قد أوقعت

الجالسة على الأرض ورمت وراءها

أشياءها وتجمع الناس حولهم)

الجارّة : (على الأرض) أى أى .. كسرتى دراعى
إلهى ينكسر ضهرك .. أى أى ..

مباركة : ولية ماتختشيش .. شايفانى قاعدة جنبك م
الصبح وعمالة ازغطك بيض وسميط وجبنة
رومى م اللي تسوى الشئ الفلانى ..

إبراهيم : (من بعيد) عيب كده يامدام مباركة !

(النساء يضحكن على كلمة مدام

والبعض يرددنها مع كلمة هانم)

الجارّة : شوفوا لى دكتور يخليهم لكم .. مش قادرة
أتحرك .. رجلى إنكسرت .. مفصللى فك ..
وسطى إنشرخ ..

إبراهيم : حاولى يا هانم .. دى وقعة بسيطة .. مش

معقول تكون عملت كده !

الجاره : بتكذبنى يا عرة الأفندية .. يا صايح يا ضايح يا

واقع يا بايع ! بتكذب بنت الأكابر اللى الزمن

قسى عليها يا شايب يا عايب يا سايب يا دايب ..

إبراهيم : الله الله الله ! دانا فى مقتبل العمر يا هانم !

الجالس : إنت مالك إنت ومالهم .. أهى مباركة قعدت

بالقوة وإبقى قابلى لو رضيت تقعد

صاحبتنا .. خلاص (يضحك) تقدر تعتبر

أن حقها فى المكان ضاع !

إبراهيم : أما غريبة الحكاية دى ! يعنى اللى موش قاعد

ما ينادوش عليه ؟ مش ممكن ! طيب إفرض

واحد حب يفضل واقف ! ؟ ويعدين المسألة

فعلاً بسيطة يا أستاذ .. أنا إسمى قرب

ينادوه .. إسمى إبراهيم .. يعنى أول إسم فى

كشف النهاردة .. وجاى لهم من بدرى .. يعنى

ضامن !

الجالس : (يضحك ضحكة مكتومة) طب أنا بقى

موش حاقولك إسمى إيه ولا بقى لى أد إيه

باجى هنا !

إبراهيم : شوف يا محترم .. مشكلتنا فى الشرق أن

إحنا ما بنهتمش بالنظام .. كل واحد عايز دور

اللى قبلية .. ليه .. مش فاهم ؟ عشان إيه ؟
حيلق إيه ؟

الجالس : عضامى يا عالم .. ياناس ياللى ماعندكوش
مروءة .. ياناس ياهم ياواغش يازباله الخلق ..
واحدة ست تترجياكم وانتو زى الطرش
والعميان !

إبراهيم : إنتى ياست ألفاظك سيئة الاختيار ..
مباركة : ياما نفسى أقلب عليكى القفة واكبس على
نفسك ..

(فى الميكرفون : مباركة المراكبى)
لولا بس نادوا على .. المرة دى صح .. المرة
الأولانية كانوا عايزين امباركة !
الجالس : خلاص ياسيدى .. وادينا استريحنا من مباركة
إلى الأبد !

إبراهيم : إزاي يعنى .. موش فاهم ؟!
الجالس : عرفت بقى كانت بتتخانى على مكان ليه ؟
إبراهيم : يعنى جارتها موش حينادوا عليها ؟
الجالس : الله أعلم !
إبراهيم : مش عليها الدور ؟
الجالس : علمه عند ربى !
إبراهيم : إيه الكلام اللى بتقوله ده يا أخينا ؟
الجالس : إنت قلوبك ليه ؟ منظر كده متعلم ..
(يتفحصه) ماجستير على الأقل .. ان
ماكناش دكتوراه ..

إبراهيم : أيوه .. محسوبك معاه دكتوراه فى ابن جنى ..
الجالس : آه - (غير فاهم) وابن الجنية ده بتاع إيه ؟
يعنى لا مؤاخذه بببيع إيه ؟
إبراهيم : لا .. دا نحوى ..
الجالس : (ساخراً) بتاع نحوى يا نحوى .. النوحة !
(الميكرفون : صفية الدياسطى ..)
إبراهيم : سامع .. الاسم واضح - وصاحبته حتقوم على طول ..
الجالس : (يضحك) يا صفية وخبرينى يابوى على اللي قتل يسين !
إبراهيم : لازم عندنا ظروف ..
(الميكرفون : عدلى حبيب .. عدلى حبيب)
أهه .. شايف .. عدلى حبيب أهه .. قام رايح !
الجالس : اللي قام ده عادل حبيب .. كل يوم بيحى ويغلط فى إسمه !
إبراهيم : كل يوم إزاي ؟
الجالس : فيه ناس كده !
(الميكروفون : عليه علوانى ..)
إبراهيم : شايف الحركة .. (كل الناس تقوم) أهه
الطابور إتحرك .. ما تقعدش بقى تشكك فى أول تجربة حقيقية فى تطبيق النظام ..
(الناس تتجه إلى باب الشارع) الله ! هو الناس دى كلها راحت فىن ؟

الجالس : أصل لا مؤاخذه لما يوصل الكشف لمدام عليه

علوانى يبقى خلاص !

إبراهيم : إشرح لى ! وضع لى !

الجالس : (ينهض وينهمك فى لحظة تصوف) عليه

علوانى معناها اللى فوق اكتفوا .. ماعادوش

عايزين يشوفوا حد من خلقة .. تقوم نروح

وننظر جواب جديد .. عليه فى العالى ..

وعلوانى فى العلالى .. نروح إحنا فين ؟ نيجى

تانى مدام إسمنا ماتتاداش ! ومنتظر ..

ونصبر .. يمكن ييجى الدور علينا ونستريح ..

إبراهيم : يا ساتر ! دانت كلامك مقبض .. كلام مخيف !

الجالس : يا سيادة الأفندى يابن الجنية .. أنا زيك مؤمن

بالنظام .. ومن حسن الحظ أن المركز ده فيه

كمبيوتر لا يمكن يغلط .. وممكن أقعد انتظر

دورى برضه .. مالازم الدور حييجى .. لكن

ساعات تلاقينى طقيت .. عن أذنك

إبراهيم : الله .. سيادتك ماشى ؟

الجالس : حلوة دى .. لا .. راكب ..

(يخرج)

إبراهيم : الأماكن كلها فضيت .. دلوقتى ينادوا على

إسمك وتعرف أن كلامى صح ..

إبراهيم : (وحده فى القاعة) الساعة ما بقيتش ١٢

لسه .. يعنى الخزنة لسه مفتوحة .. يعنى

ما فيش أى عذر يخللى الناس يروحوا فجأة
وهما تلاقىهم منتظرين من ستة الصبح !
طيب .. دلوقتى ينادوا على اسمى .. لازم يكون
قرب .. (ينظر فى الحقيقية) أخ ! نسيت
الجرنال ! لا والله الجرنال أه .. الواحد من
كثر الشغل بينسى العالم بيحصل فيه إيه ! أنا
متيهأ لى أن أماكن الانتظار دى بتدى الواحد
فرصة يشم نفسه .. ياخذ أجازة من الجرى
ورا لقمة العيش .. ممكن هنا يتأمل الدنيا ..
يشوف أخبار العالم الشرق والغرب ..
والجنوب والشمال .. طبعاً .. يعنى لازم الواحد
يعيش فى الدنيا .. (يقرأ) « براءة المرأة التى
أكلت ذراع زوجها » .. ازاي دى ؟ براءة ؟
براءة إزاي ؟ يمكن دفاع عن النفس .. (يقرأ
فى غمغمة) آه .. فهمت .. يا أخى بتوع
الجرايد دول مهولانية .. هى مش أكلت ذراع
جوزها .. دى عضته .. كده يبقى مفهوم .. لكن
يقول لك أكلت ذراع جوزها ويسؤوا سمعتها ..
أهى دلوقتى حيبقى من الصعب عليها تتجوز !
ما هو ذراع الواحد مهم ! لكن لوعضة .. زى
القطة .. طب ما القطة ماعضتني داك النهار
بدلع كده .. قال يعنى ماجبتليش أكل حلو من
مدة ! والله القطط دول كائنات حساسة !

(ينادى فى الميكروفون : عبدالرحمن
الاجهورى عبدالصمد الاجهورى)
إبراهيم : (ينهض) (ويستعد) قربت .. يامهون
العسير يارب !
(ينادى فى الميكروفون : سميح القاسم ..
سميح القاسم ..)
(فجأة يدخل رجل مهوولاً من باب
الشارع إلى القاعة ومباشرة إلى باب
المقابلة)
إبراهيم : الله ! كان فين ده ؟ معلش .. كويس .. يعنى
الطابور إتحرك بعد ست عليه .. مش زى
صاحبنا ما قال .. ومين عارف ؟ ما كان يمكن
يكون هو عبدالصمد ؟
(الميكروفون ينادى : سميحة توفيق ..
سميحة توفيق ..)
إبراهيم : (يعيد الصحيفة إلى الحقيبة) الواحد
لازم يجرى أول ما ينادوا ..
(الميكروفون : إبراهيم الشعراوى)
إبراهيم : يا منت كريم يارب !
(يجرى خارجاً من باب المقابلة وبعد
ثانية واحدة يعود منكس الرأس)
إبراهيم : إبراهيم الشعراوى ! وأنا إبراهيم شعراوى !
معلش .. فرقت بنط ..
(ينظر فى الساعة)

ياه .. داحنا بقينا الساعة إثنين .. كويس إنى
جبت معاى سندوتش .. وأنا سامع دربة ميه
هنا .. سرسوب الحنفية اللى ما يبطلش أبداً ..
عال .. وحلوة المواعيد الجديدة بتاعة الحكومة
دى .. مش زى زمان .. الناس تزوغ من واحدة
ونص ويالله .. لا .. من ١٠ لخمسة والنهار
طويل والناس تلحق تيجى وتروح .. يالله ..
وأدى غديوة .. (يفرد ورقة الصحيفة التى
يوجد فيها الطعام - وبمجرد ان يفعل ذلك
يسمع خرفشة فى الميكروفون فيتصلب)
حينادوا على .. عندى إحساس إنهم حينادوا
على .. طب أأجل الأكل شوية .. (صمت)
على إيه ؟ دى لقمة ونخلص .. (يبدأ فى
تناول الطعام وتعلو فى الخلفية
موسيقى « أنا هنا يابن الحلال ») الله ..
غنوة جميلة .. فىن هى بنت الحلال دى ؟ لا لا
لا .. دى دكهة بتاعة صباح .. بتاعة الجبنة
والزيتونة .. فىن فىن ؟ كله عايز لحمة النهاردة
وفراخ وسمك .. آمال .. وأقول لها نبدأ
بالجبنة والزتون لحد ما نوصل تقول لى ليه ؟
هو أنا موش زى إخوانى ؟ إنت مابتشوفش
الناس بتأكل إيه فى التلفزيون ؟ أقول عندها
حق .. وبصراحة عليها سنان عايزا لها أفخر

اللحوم البلدية والمصنعة .. أمريكانا ! أطيب
لحم يمكن تذوقه .. وطبعاً لو ماوفرتش لها
اللحوم يبقى عوض الله فى دراعك !
(يكون قد انهمك تماماً فى الطعام) شوية
مية بقى كده تبقى تمام :

حتة جبنة قديمة تبقى الأكلة عظيمة
شوية فول حراتى تبقى الأكلة ذواتى
(الميكرفون ينادى إبراهيم شعراوى)
أهه أهه أهه ! طب بس أبلع .. حاشرق ياناس !
(يجرى خارجاً) (بعد ثانية واحدة
يعود مهموماً) آل اتأخرت آل ؟ دانا حتى
ماشربتش مية .. حرام عليكو ياناس .. النظام
النظام ! أيوه .. أينعم النظام حلو لكن .. يا
عالم دى ثانية واحدة .. إيه اللى حصل ؟
أيوه .. هما عندهم حق .. أنا اترددت .. قلت
أشرب مية والا أروح المقابلة .. لحظة واحدة ..
بتاع الانجليزى بيسميها critical moment لحظة
دراما مفتخرة .. وضاعت الفرصة الثانية ..
دلوقتى فاضل لى فرصة واحدة .. ولو فاتتنى
خلاص .. يبقى نلم الجرايد دى .. ونشيل
المأكولات .. الله .. وإيه ده ؟ دى بيجاما ..
ياترى بتاعة مين ؟ حد نساها ضرورى ! لكن
دى جديدة خالص ! بدبايسها .. عايزة

صوابع شيرين الحلوة تفتحها وتفردھا ..
وتلبسھا ! (يضحك) دى عايزة لها دستة !
والله مانا عارف عايزة إيه م الدنيا -
(بقعة ضوء تظهر تحتها شيرين)

شيرين : عايزة الستر يابراهيم !
إبراهيم : ما هى مستورة والحمد لله !
شيرين : مستورة بالميتين جنيه بتوعك والا التسعين
بتوعى ؟
إبراهيم : (ينتبه إلى إنه يحدث شيرين) الله ! إيه
الحكاية ؟ إنت يا شيرين مش بقى لك كام سنة
معجبة بابن جنى ومدرسته النحوية وقلتى ..
شيرين : ده كان زمان أيام التلمذة ..
إبراهيم : استنى ما تقاطعنيش
شيرين : أيام الانبهار بتطور النحو وجمال التخريجات
وأوجه التقدير ..
إبراهيم : لكن قلتى إنك حتعملى زى الفراء وتنامى على
كتاب سيبويه ..
شيرين : وأموت عليه ! ؟ موش لما أبقي أعيش الأول !
إبراهيم : مانا حاسافر السفرية اللى هى وبكرة تشوفى
الأخفش الكبير اللى مش عاجبك حيحيب قد
إيه !
شيرين : نسافر فين ؟ دانت خلّيت الدنيا ضاقت عليك
وقفلت ..

إبراهيم : ما هو مش مهم البلد يا شيرين .. المهم
الفلوس ..

شيرين : الفلوس موجودة فى مصر ..

إبراهيم : أيوه لكن موش زى ..

شيرين : موش حأجل حياتى لحاد ما الم قرشين .. أنا
عايزة أعيش هنا .. ألبس حلو .. وأقرأ الكتب
اللى غايزاها .. وأسوق عربيتى الخاصة ..
وأروح السينما .. وأروح المسرح .. وأخرج مع
صحابى البنات نقضى يوم فى إسكندرية
ونرجع ..

إبراهيم : ما هو ده مش ممكن من غير فلوس يا شوشو !
شيرين : هى .. حلوة يا شوشو دى ! ما أسامة
أخويا عايش كده من غير سفر ..

إبراهيم : أسامة جراح تجميل .. يصغر فى مناخير ده
ويكبر فى حواجب ده ..

شيرين : وحسام ابن خالتى ؟

إبراهيم : دا مأمور ضرايب وإنتى عارفة بقى !

شيرين : عارفة ؟ عارفة إيه يا برهيم ؟ حسام ابن خالتى
حرامى ؟

إبراهيم : فشر يا شيرين ! ماتزعلش منى ! أنا أقصد
إنى لما نقلت الجامعة بعد الدكتوراة ..

شيرين : وشفتنى ..

إبراهيم : وشفتك .. آه .. دا كان أجمل يوم فى حياتى ..
لكن

شيرين : قول اعترف .. لكن إيه ؟
إبراهيم : الجامعة سكتها ضلّمة شوية ! الواحد زى
مايكون إرتكب أكبر غلطة فى حياته .. وأديكى
متابعة مشاكل من سنين .. أنا مستعد أموت
نفسى واحقق حلمى يا شيرين .. امنيتى
الوحيدة دلوقتى ان احنا نتجوز ..
شيرين : (فى رقة) وأنا ماقلتش لأيا برهوم .. انت
راجل طيب ومخلص ومجد .. وأنا بكرة حاخذ
الدكتوراة برضه .. وفى نفس التخصص .. إن
شاء الله ..
إبراهيم : ونألف كتاب نيسط فيه النحو على طريقة ابن
مضاء القرطبى ..
شيرين : ده يبقى هایل .. دا يجيب لنا آلاف الجنيهات ..
تصور كده لما يتقرر على جميع المدارس
الثانوية والاعدادية ..
إبراهيم : ليه ؟ والابتدائية !
شيرين : والمدرسة اللى كنت فيها !
إبراهيم : دا يبقى يوم المنى ! يوم ما الشيخ الدسوقى
يمسك الكتاب يلاقيه تأليف فلان وفلانة ..
شيرين : يبقى بلاش إعاره بقى ..
إبراهيم : بلاش إعاره إزاي .. مش ممكن .. دانا اللى
على الدور

(الميكروفون : آخر اسم النهاردة حمودة

عبدالسميع -)

حمودة مين ؟ إبراهيم شعراوى ! أنا اللي على

الدور (تختفى شيرين ويجرى هو نحو

باب غرفة المقابلات فيخرج له رجلان)

إبراهيم : وسع إنت وهو .. أنا حاقابل المدير ..

(يدفعانه إلى الخلف)

إيه ! ماتزقش إنت وهو .. فاكرين نفسكم مين ؟

أنا إبراهيم شعراوى والأجر على الله .. الله ..

الدكتور إبراهيم شعراوى .. اللي حيلمسنى

حاوديه فى داهية ..

رجل ١ : إنت سمعت اسمك دلوقت ؟

إبراهيم : لا .. أ .. المفروض

رجل ٢ : يبقى تستنى لما تسمع إسمك ..

إبراهيم : أنا اللي على الدور .. دا حقى .. دا النظام

الجديد .. من حقى ثلاث مرات .. هى فوضى

والأ فوضى .. والله لاشتكى للمدير العام ..

(يدفعانه ويخرجان)

تَحَطَّى الدور ده هو المشكلة .. ودى بلدنا واحنا

راضيين بكده ..

(الميكروفون : عبدالجليل العمرى ..

عبدالجليل العمرى)

عبدالجليل آل .. طب إيه جاب العين للحه ..

يعنى حمودة يبقى وراها عبد الجليل ! والله
فوضى ! زى يوم مارقوا الشيخ الدسوقي
ناظر .. وهو كان لا ينفع ناظر ولا مفتش ولا
مدرس أول حتى .. لكن إيه .. نقلوه ياسيدي
للأقاليم بترقية .. وهو يموت فى الأقاليم .. قلت
لهم ياخوانا أنا على الدور .. اسمى أول
الكشف وأخد ليسانسية ممتازة مع مرتبة
الشرف .. وتقاريرى ممتاز مش بس فى
السنتين الاخارى لكن من يوم ما اتخرجت !
الطلبة بيتغنوا بدروسى .. أى والله .. بيغنوها
زى أم كلثوم ..

(ميكرفون - الآن وقت الراحة - نعود بعد
الظهر إن شاء الله)

إبراهيم : (فى غيظ يسب ويلعن)

دا اللي أنا كنت عامل حسابه .. يقول لك
« فوت بكرة » على رأى محمد سلماوى والا
« اللي بعده » .. حقه .. فقلبها مسرح !
لا بقى .. أنا موش حافوت بكرة ! أنا قاعد لهم
على طول .. لايد لهم فى الدرة طول النهار ..
وقت الراحة ؟ وماله .. نستريح ! وأدى
نومه .. (يضطجع وينام)
(تخفت الأضواء تدريجياً ثم تنطفئ ثم
توقد خافتة)

إبراهيم : (ينهض بتثاقل) اللهم أجعله خير يارب !
حلم والا علم ! أنا فين ؟ آه .. فى المكتب
النموذجى .. ياترى فتحوا والا لا ؟ فتحوا ؟ دا
هنا من الصبح ! (ينظر إلى الساعة) ياه ..
دا حنا اتأخرنا قوى .. آمال ماحدش صحانى
ليه ؟ نهايته .. أجى بكره وأمرى إلى الله ..
(يسير إلى باب الشارع فيجده مغلقاً)
ياريس .. يافراش .. يابتاع الأمن ! (يطرق
الباب) سامعنى ؟ حد سامعنى ؟ (يتجه
إلى باب غرفة المقابلات) ياريس ..
ياساعى .. ياضابط .. ياباشا ! حد يفتح لى
خلينى أروح .. دا يوم إيه اللى موش
فايت ده ؟ (يزيد الطرق) افتح يا جدد إنت
وهو أحسن لكم ! والله ماحيحصل طيب أبداً ..
إيه ! عايزنى أقضى الليل هنا أظن ؟ ياسلام !
(الميكروفون : نعلم السادة المواطنين أن
التحرك يكون بناء على نداء الأسماء وأن
الحركة بالدور فقط)
ماهونا اللى على الدور ! اسألوا ياخوانا
المدير ! دانا حتى قابلته وشفته .. ياجماعة
دانتو دعاة النظام والدقة .. موش كدة آمال ..
(يقرع الباب) افتح يا جدد انت !
(يدخل الرجلان الضخمان)

رجل ١ : انت سمعت اسمك ؟

إبراهيم : لا .. آه .. أصل

رجل ٢ : ماتت حركش إلا أما تسمع اسمك .

(يخرجان)

إبراهيم : افتح يا جدد انت .. افتح يا شعير .. افتح يا

فول .. افتح يادره .. (يضحك ضحكة

صفراء) سايق عليك النبي تفتح يا .. كان

زمان أيام على بابا .. كنت مليت الزكايب

ورميتها فى حجر شيرين .. ما هى أصلها

عينها فارغة .. وهى يعنى حتعمل إيه بالفلوس

دى كلها ؟ عايزة تسافر أوربا .. ليه ؟ تقول لك

امتع عيني .. ياسلام .. وهو العلم والمعرفة مش

متعة للعينين برضه ؟ وفى الحقيقة بقى ..

(لحظة عاطفية رهيبة) مافيش زى شيرين

متعة للعينين .. أوربة مين ياعم .. البياض

والعيون الخضرا . والشعر الأصفر ..

والدراعات الملفوفة .. الدراعات دى جمع

ازاى ؟ الذراعين ! الفتنة .. ولها حق .. والله

هى ديتها سنتين فى الخليج وارجع اروشها

بالفلوس روش ! اسكن مثلاً مع ناس صحابى

فى شقة كل واحد أودة .. أيوه عشان

الاستقلال .. ما أحبش حد يقعد معاى فى

أودة واحدة .. لا لا لا .. كل واحد فى أودة .

ولو انه آخر مرة كنا فى اسطمبول كنا كل
ثلاثة فى أودة وكان موش بطل .. نسيبها
لظروفها .. واهاديا فى عيد ميلادها بعربية
١٢٦ - ياولد ! الحارة كلها حترزغرت لها ..
وبعدين أهى تعرف تركن لحد مانسكن فى
مصر الجديدة والا حاجة .. (يتشاءب)
إيه النوم اللى حاطط على ده ؟ أعوذ بالله من
غضب الله .. فوق ياد يابراهيم أحسن
يحبسوك هنا بجد وتلاقى نفسك ممدد ع
البنش !

(صوت عبدالوهاب فى الخلفية)

بالليل أسيب نفسى لهمى وأفكارى
أكلّمك وأسمع حسك وأشكى غرامى
وأقوم أضمك مالقاش غير أوهامى
لما أنت ناوى تغيب على طول !
يا سلام عليك يا محمد ! ندشن البيجاما
الجديدة .. مين عارف وراءها إيه ؟ هه وأدى
نومة !

(يلبس البيجاما ويضطجع على

البنش)

(تخفت الأضواء ثم تنطفئ ثم توقد بنور
النهار)

بسم الله الرحمن الرحيم ! وأدى ليلة من ليالى
شهرزاد ..

(يجرى نحو الحمام)

الحمد لله .. وادبنا فوقنا نفسنا وحمدنا
ربنا .. مش مهم الفطار بقى .. أول ما يفتح
الميكرفون على ودنه ..

(الميكرفون - فى التاسعة تماماً تبدأ
المقابلات)

إمرأة : (داخله) كل الزحمة دى ع الصبح ؟ دى
مصيبة إيه دى ؟

إبراهيم : (منزعجاً) بسم الله الرحمن الرحيم .. فين
هى الزحمة دى ياست ؟

المراة : اف .. اف .. أصل أنا إكره ماعلى النفس ..
وعشان كده ماحبش أسافر درجة ثالثة
واصل .. دايمًا ثانية ..

إبراهيم : دا مافيش غيرى وغيرك ..
المراة : النبى إيه ؟ اعملها حلوانة فى سلوانة واقعد
جنبى ..

إبراهيم عيب يامدام دانا -
المراة : هو انتوتعرفوا العيب .. دانتو العيب يتبرى
منكو ..

إبراهيم : الكلام ده مالوش لازمة يامدام .. أنا باحذرك
(ميكرفون - ميمونة غطاش .. ميمونة
غطاش ..)

(تجرى خارجة)

ياساتر ! لكن معلش .. الطابور اتحرك ..

(يدخل عدد كبير من الناس يملأون)

القاعة بسرعة وإبراهيم فى زهول - ثم

تتكرر نداءات الميكروفون بسرعة وهو

يتابعها مثلما حدث سابقاً)

الجالس : صباح الخير ياسيدنا الأفندى .. والله ولقيتك
مكان ..

إبراهيم : الله ! هو انتو بتوع إمبارح ؟

الجالس : شوية وشوية ..

إبراهيم : يعنى اللي فاتهم دور إمبارح حيخشوا
النهارده ؟

الجالس : موش شرط ..

إبراهيم : إزاي بس يا .. لا مؤاخذه ماعرفتتش إسمك ..

الجالس : مش مهم .. ما بين الخيرين حساب ..

(ميكروفون : حسن عبدالله)

(يخرج)

(ميكروفون - سنية عمران)

(تخرج)

(ميكروفون - طويلة عبدالسلام)

(يخرج)

(ميكروفون - جمال الدين محمود)

(يخرج)

(ميكروفون - سعيد عبدالمغنى)

(يخرج)

(ميكروفون - عليا علوانى)

الجالس : (ينهض) فتك بعافية .. سلامو عليكو
إبراهيم : استنى ما يمكن ينادوا علينا دلوقتى .. مش
معقول ياعم إنت .. يبقى مشوار بفايدة ..
يومين ورا بعض ..

الجالس : (يضحك) سلامو عليكو .. (يخرج)
إبراهيم : فضيت القاعة زى إمبراح .. يبقى أفتح ودانى
كوبس بقى أحسن ما اسمعش الأسم صح ..
(أسماء تتوالى مختلطة من الميكروفون :
زكية سعد - اسعد زكى - مسعود عبد
الصمد - حمديا النبى - نوره عبد
الحليم - لورا الاسيوطى)

إبراهيم : إلهى يكرمك قول إسمى بقى .. دانا حاموت م
الجوع وحتى السندوتش ما عنديش ..
(ميكروفون - إسماعيل عبد الله - احمد
سوخة - عبد الله فسيخة - سلامة
سلام - عبد الغنى أشعب)

إبراهيم : إسمى إبراهيم شعرواى إلهى يكرمك ..
(يفتح الحقيبة فيجد صحيفة الأمس -
ولكنه يفاجأ بساندويتش جديد)
إيه الحكاية ؟ طيب جرنان إمبراح مفهوم ! لكن

السندوتش الجديد منين ؟ والله مانا عاتقه ..
(يلتهمه التهاما) ياسلام ياولاد .. دمافيش
أحلى م الجبنة والزيتون لو كان معاهم
طماطم .. (يتثأب - ينام)
(تخفت الأضواء - تنطفئ - تعود
أضواء نهار)

إبراهيم : (آثار التقدم فى السن بادية عليه ..
لحيته كثيفة وقامته منحنية)
اللهم اجعله خير .. حملت حلم جميل .. اللهم
أجعله خير ! هم الزباين وصلوا .. (يضحك)
حملت إنهم قالوا أسمى النهاردة .. وليه لا ؟
مين عارف ؟

الجار : صباح الخير يا ابو خليل .. ما شففتكش من
زمان .. أصلى كنت فى إغارة ولسه راجع م
السفر ..

إبراهيم : حمد لله بالسلامة .. وما سمعتش عن إسمه إيه
اللى كان بيقد جنبى ..

الجار : قصدك عبد السميع أبو غزالة ؟ ما ربنا فتح
عليه وفتح مدارس خصوصيه لحسابه ..

إبراهيم : ربنا يوعدنا

الجار : طب ما حنا فيها ..

إبراهيم : لا لا لا .. أنا قلبى حاسس إن النهارده حينادوا
إسمى .. إنت مش حاسس نفس الإحساس ؟

قول لى بصراحة .. إنت موش حاسس كده ..
إنه النهارده بالذات ..
الجار : بصراحة يابو خليل لأ .. أنا حانتظر الوقت
المحدد ولو ما نا دوش حاروَّح وخلص ..
**(ميكرفون : الشُّضلى النواوى ..
الشضلى النواوى)**
فتك بعافية يابو خليل ..
**(ميكرفون يكر الأسماء بسرعة مزدوجة -
وبسرعة تخرج الزبائن ويسود الظلام)**
إبراهيم : الواحد بقى بيكس النوم عليه بدرى ..
(يخفت الضوء - ظلام - نور النهار)
إبراهيم : (الآن يبدو فى الستين على الأقل) الحمد
لله على كل شىء .. وأدى يوم جديد جميل ..
ياترى مكتوب لك إيه فىن يابو خليل ! ؟ فىن
الزباين ؟ الله ! دا فيه واحد جديد ! ياترى
تخصصه إيه ؟ صباح الخير يابنى ..
الولد : صباح الخير !
إبراهيم : إنت أول مرة تيجى .. موش كده ؟
الولد : أيوه .. ليه ؟
إبراهيم : أصل أنا تقريبا ساكن هنا .. (يضحك) بقيت
أعرف الزبائن كلهم ..
الولد : ما هم بيتغيروا ياعمى كل شويه ضرورى !

إبراهيم : مش ضرورى ولا حاجة يابنى .. أنا كنت أول
ما جيت مؤمن بالنظام والدور والترتيب ..
وبعدين بقى ..

الولد : أنا لسه مؤمن بالحاجات دى ياعمى .. أحنا
تقدمنا قوى فى الفترة الأخيرة دى ..

إبراهيم : ومن قبل ما تتولد يابنى .. من ساعة ما خدت
الدكتورة .. أنا موش عارف إيه اللى مخلىنى
فاتح قلبى لك وباحكى لك كل حاجة ..

الولد : وأنا كمان ياعمى ..

إبراهيم : يمكن عشان تخصصك عربى .. أوعى تقول لا!
الولد : أهى دى مفاجأة صحيح !

إبراهيم : وخلينى أضمن .. نحو وصرف ؟

الولد : موش ممكن ! هو بيبان على الوش والا إيه ؟

إبراهيم : ما هو أنا كذلك ..

الولد : الله ! أمال أنا ما سمعتش عنك ليه ؟

إبراهيم : لازم تكون سمعت عنى .. أنا بس اتعطلت الكام

سنة دول .. كنت عايز أروح إعاره للخليج ..

ومين عارف .. يمكن يكون وشك حلو على

واروح النهارده ..

الولد : لكن دى مستشفى ياعمى ؟ موش فاهم !

إبراهيم : أصل لما جيت اسافر قالوا لى عندى مرض

وحش .. روح اكشف ..

الولد : ومن يومها أختفيت (بحماس وألم)

وماحدث سمع بعد كده عن إبراهيم شعرواى

إبراهيم : (بحضنه ويكي) أنت تعرفنى .. قرئت لى
حاجة ..
الولد : لا ياعمى أنا ما قرئتش حاجة .. أنا أبقى ابن
شيرين عبد الحميد .. تلميذتك ..
إبراهيم : ابن شيرين ؟ شيرين مين ؟ مش ممكن !
شيرين إتجوزت ؟
الولد : وأنا البكرى .. إسمى حامد .. وبابا الله يرحمه
إسمه على المهدواى ..
إبراهيم : على المهدواى .. الله يرحمه ؟ مات إمتى
ياحامد ؟
الولد : من سنين ياعمى .. لدرجه إننى ما افتكروش ..
إبراهيم : على المهدواى بتاع الأدب الحديث ؟
الولد : أنا جئ أخذ معاد إماما ..
إبراهيم : شيرين .. هانم ! ليه ياحامد يابنى .. خير ..
الولد : عايزة تكشف يعنى .. دورى !
إبراهيم : ياسلام .. شوف الدنيا .. يعنى مكتوب لى
أشوفها ..
الولد : دى بتقول إنها قعدت سنين تدور عليك
وتستناك .. ويعدين لما تصورت لا قدر الله ..
حضرتك عارف ..
إبراهيم : أيوه أيوه ياحامد ..
(ميكروفون : حامد المهدواى)
إيه يابنى لحقت ؟
(يخرج حامد ويعود فورا)

الولد : ما هو بالكمبيوتر يا عمى .. مش زى أيامكو ؟
إنت عايز إيه ؟ شهادة طبية عشان الترشيح
والا تكشف ؟

إبراهيم : والله ما نا عارف يا حامد .. أنا كنت فاكراً إنه
مركز نموذجي للإعاقات .. وبعدين أفكرت
إنها مستشفى ! وبعدين مركز نموذجي
(تدخل شيرين)

شيرين : حامد ؟ خلاص ؟

الولد : ماما .. أنا عندي مفاجأة لك .. عمى .. إبراهيم
شعرواى ..

إبراهيم شعرواى .. أزاى ؟ .. مش ممكن ..
إبراهيم : شيرين ؟ هانم .. معلش .. أعذرني .. نظري
ضعف وذاكرتي ما بقيتش مساعداً قوى ..
شيرين : إبراهيم ! إنت رحت فين السنين دي كلها ؟
معقول دي ؟ سافرت ؟ كنت عايز تسافر .. والا
عملت مدراس خصوصية زى زميلك
العفاريات ؟ تعال ! إنت لازم تقوللى على كل
حاجة .. من ساعة ما سافرت ورجعت ..
إبراهيم : ماتأخذنيش يا شيرين هانم .. أصلى أنا الدور
على وخايف يفوتني .. لذلك تلا قيني منتظم
واحب النظام جدا ..
(ميكروفون يقول : إبراهيم شعرواى)

أهه .. سمعتوا .. إسمى .. الدور بتاعى .. ولا
يمكن يفوتنى ..

(يخرج)

شيرين : روح معاه ياحامد .. ما تسيوش يا حبيبي .. أنا
منتظرة .. يامنت كريم يارب ..

حامد : حاضر ياماما ..

الرجل ١ : رايح فين ؟

حامد : مع عمى ..

الرجل ٢ : مافيش مرور من هنا .. اللي يدخل م الباب ده
ما يطلعش ..

حامد : لكن عمى ..

الرجل ١ : خلاص يابنى .. اتفضل إنت .. مع السلامة ..

شيرين : إيه ياحامد .. فين إبراهيم ؟

حامد : خلاص ياماما .. جه عليه الدور .

ستار

نہایتہ ..
مسرحیۃ من فصل واحد

غرفة جلوس عادية في منزل مصري ولكنها تتميز بالضيق الشديد - فيها الى اليسار باب يؤدي الى غرفة الصالون وهو باب زجاجي يبدو الضو من خلفه اذا كانت الغرفة مضاة . الى الخلف مباشرة يبدو المطبخ واضحا مرتبا وانيقا ، وعليه باب بجرار ، والى أقصى اليمين باب الشقة (من الشارع) أمامه الى أقصى اليسار باب يؤدي الى غرفة النوم والحمام .

ا عندما ترتفع الستار يذفل عبد الستار من باب غرفة النوم وقد ارتدى حلة أنيقة ذات موضة قديمة . وهو في أوائل الستينات ولكنه يبدو تقليديا في نظيره الى أقصى الحدود - بمعنى أنه ينتمى في نظره الى اواسط القرن العشرين لا الى أواخره ، وله شارب كث ويتكلم بتؤدة وثقة ولا يتفعل كثيرا ، وإذا أنفعل يهز عصاه في الهواء .

اعبد الستار ينظر حوله ثم يتلصص لينظر من فتحة الباب الموارب لغرفة الصالون المضاة .

والراضع إن الوقت متأخر أى بعد الغروب والفصل
فصل الشتاء . يحاول قدر الطاقة إن يبدو كأنه لا
يتلصص ولكنه فى الحقيقة يختلس النظرات وفجأة
تدخل زوجته يسرية من باب المطبخ)

يسرية : عبد الستار ! (هامسة) عبد الستار ! تعال

هنا عندى .. بتعمل إيه هناك ؟

عبدالستار : (مخرجاً) إيه ؟ فيه إيه ؟ عايزه إيه ؟

يسرية : تعال هنا عيب !

عبدالستار : وأنا عملت حاجة ؟ أما غريبة صحيح ؟

يسرية : عيب يا عبد الستار تبص ع الولاد كأنك مش

مستأمنهم .. وبعدين دول ما بقوش صغيرين !

لا نجوى ولا خطيبها ..

عبدالستار : مين قال إنه خطيبها ؟

يسرية : متهاكى ما بقاش فيها شك بقى ..

عبدالستار : لا فيها .. مادام مافيش حاجة تمت رسمى ..

يسرية : رسمى إيه إنت كمان يا عبده .. (تلاطفه) ما

خلينا الرسمى ده لأ يام زمان ..

عبدالستار : لا لا لا .. الرسمى رسمى .. والمجتمع ..

يسرية : (ضاحكة) دانت من ثلاثين سنة ما كنتش

كده ! إنت نفسك .. عبد الستار الدقماق !

عبدالستار : يمكن .. لكن الزمن .. (يكون قد عاد بحركته

إلى الباب)

يسرية : أوعى تبص عليهم .. إفهم بقى علم النفس .. لما تدى للولاد ثقة يقوموا يتصرفوا فى حدود الثقة .. لكن لما تكبس على نفسهم يقوموا يحسوا بأنهم عيال ويحاولوا يخدعوك ويضحكوا عليك!

عبدالستار : طب بس أقول لهم إن أنا خارج .. يمكن عشان يتكسف هو كمان ويخرج ..

يسرية : وإنت عايزه يخرج ليه ؟ مضايك فى إيه ؟

(تسمع فى الغرفة ضحكات مرحة

وخليعة)

عبدالستار : (متوترا) .. مين قال إنه مضايقنى ؟ بالعكس ..

يسرية : خلاص .. أتوكل على الله إنت ..

عبدالستار : بس أسلم عليه ..

يسرية : عبد الستار ! إنت شايف فيه حاجه أنا موش شايفها ؟ قول لى بصراحة !

عبدالستار : الحمد لله إنك خدتى بالك !

يسرية : خدت بالى من إيه ؟ حرام عليك .. أوعى تظلم حد .. ربنا شايفك ..

عبدالستار : لا دا مش ظلم .. كمال ولد رقيق ! يمكن من عيلة كبيرة .. يمكن من أصول أرستوقراطية .. لكن كل اللي فضل له من الأصول دى شوية .. (يبحث عن الكلمة) ليونة ؟ ميوعة ؟ ما

اعرفش .. لعلك لاحظتني بيسلم إزاي على ..
وعليكي ! لعلك لاحظتني إزاي بيمشني إزاي
بيضحك .. بياكل .. بيشرب ..
يسرية : متعود تشوف غريان .. يوم ما شفت الطاوس
قلت ده مايع !
عبدالستار : لا لا لا ! إعترفني إنه مش مضبوط .. مفكوك ..
سايب .. مش ماسك في نفسه ..
يسرية : والا عشان ابن رئيسك القديم ..
عبدالستار : فشر ! أنا ذهني يروح للمرحوم طه الخازندار
باشا ! ؟ اللي ماتوا دفنوا معاهم ذنوبهم ..
خلاص .. بالعكس .. دأنا بأشفق عليه عشان
أسرته وظروف نشأته كانت كده !
يسرية : أنا عمرى ما اهتميت لما كات والدته - الله
يرحمها - تنغزني بكلمة كده والاكده .. فاكرك ؟
أيام العزايم والصحبة ؟
عبدالستار : يايسرية ! دانتى ما جالكيش نوم ليلة بحالها
عشان قالت لك مش عارف خدمة إيه وست بيت
إيه ..
يسرية : كانت قرشانة .. أنا عارفة خلفت كمال السكره
ده إزاي ؟
عبدالستار : إسمها الأصلي ترانديل هانم .. من أصل
تركي .. ويديك قالت لك الخدمة مش عارف
إيه رحتى ملوية وكات ليلة ..

يسرية : الله يسامحها بقى .. كات دايماً تقول أن ست
ألبيت فى الحقيقة خدامة ! واحنا مافيش فى
عيلتنا خدامين !

عبدالستار : قصدها ستات بيوت ؟

يسرية : الله يسامحها بقى ! خللى قلبك أبيض
ياعبده ! الواد بيحبنا والود وده يشيلنا فوق
رأسه .. واحنا مش حنحمكه خناقات عيلته !

عبدالستار : أنا لا باحمل ولا بانيل .. أنا عايز أعرف عايز
ايه من بنتى!

يسرية : كل ده وما انتش عارف .. والنبي دى لو
أتجوزت كمال ما حيخلى فى نفسها
حاجة .. كريم وايده سايبه ..

عبدالستار : حيعمل بيه ويخليها تخدمه ..

يسرية : فشر ..

عبدالستار : لو انسى أنه ابن الخازندار ..

(فجأة تسمع ضجة شئ يقع وأشياء

تتكسر)

عبدالستار : (يجرى إلى غرفة الصالون) خير ياولاد ..
إيه اللى حصل ؟

نجوى : (تجرى خارجة) لا يابابا مافيش حاجة ..
دانا وقعت البونبونيرة ..

عبدالستار : واتفشفت عشرين حبة !

نجوى : ابدأ يابابا .. حتى شوف !

يسرية : (تكون قد أتت بجاروف ومقششة من

المطبخ وتنهمك فى لم الزجاج) دا الغطا

بس يا عبده ..

عبدالستار : الغطا ! بتقول الغطا بس ؟ إنتى عارفة الغطا

لوحدته النهارده يساوى كام ؟ وإيه اللي وقعها

ياست نجوى ؟ إيه اللي خلا الغطا يقع ؟

كمال : (فى منتهى الخجل) ماتأخذنيش يا عمى ..

لامؤاخذة .. (خجل مبالغ فيه) ماتزعلش

حضرتك

عبدالستار : يبقى إنت اللي كسرت الغطا .. اعترف .. انت

اللي كسرت الغطا ..

كمال : أيوه يا عمى .. لكن حاجيب بداله .. (يمثل

الندم الشديد) ان شاء الله حلاقى !

عبدالستار : يجيب بداله مزين ؟ من ماهيته التي تبلغ كذا

وعشرين قرشا ؟ واللا من مصروف البيت اللي

أصغر م الماهية ؟!

كمال : يا عمى دى حاجة بسيطة قوى .. وان شاء الله

فى ظرف ساعة تكون رجعت .. عن اذنكم ..

(يجرى خارجاً من الشقة)

يسرية : كده كسفت الولد يا عبده ..

عبدالستار : وده بيتكسف برضه ؟

نجوى : يعنى إيه ماييتكسفش يا بابا ؟ حد يقول كده

على كمال ؟ دا غاية فى الأدب والكسوف !

عبدالستار : ولما هو غاية في الأدب والأخلاق .. ليه
ما تقدمش رسمي يطلب إيدك ؟ كل يوم والثاني
جاي يناقش مسائل مع نجوى هانم .. زى
ما تكونوا لسه في الكلية ! ما فيش حد يعرف
المسائل دي غيرك ؟ ما يعرفش يشوف له واحد
صاحبه والا واحدة صاحبتة ان كان له صاحب
رجاله ! ؟

يسرية : عبده ! عيب كده ! اسمع ما أقولك وقدام
نجوى .. والكلام ده موش حايعيده تانى ..
نجوى : لا والنبي ياماما .. ارجوكي ماتقوليش لبابا ..
يسرية : لا . أبوكي هو اللي مخلفك ولازم يعرف إنت
رايحة فين وجاية منين !

نجوى : (تحتضنها) عشان خاطري يا ماما ..
والنبي ياماما ..

عبدالستار : غريبة دي .. ايه الحكاية ؟ قولى لى إنتي
يانجوى!

يسرية : لا .. أنا اللي حاقول .. نجوى ياسيدي : قال
إيه .. موش عايزاه !

عبدالستار : (يضرب كفا بكف) لا حول ولا قوة الا
بالله .. طيب ولما هي موش عايزاه .. مانفضها
بقى !

يسرية : اصبر على يا عبده ..

نجوى : بلاش ياماما .. بلاش ياماما ..

يسرية : اللى أبوكى مايعرفوش ان كمال متربى مع
بنات واتعلق بيكى زى ماتكونى واحد
صاحبه .. أخته .. قصدى .. صداقة
عميقة قوى صحيح .. لكن صداقة بس ..
نجوى : (تبكى) بابا موش ممكن يفهم .. موش
ممكن .. موش ممكن ..
عبدالستار : ليه ؟ قفل ؟ طبعا ممكن أفهم ..
يسرية : المشكلة بقى أنه حلف قدام الكل انه ياتجوزها
يا يقتل قتيل .. يا ينتحر ..
عبدالستار : يبقى ضحك عليكم بشوية سيكولوجى عشان
يلطش البت ؟ على مين ؟
يسرية : دا حاول الانتحار مرة قبل كده يا عبده ..
نجوى : وكان حيموت .. كان حيموت خالص !
عبدالستار : رمى نفسه تحت الطرماى ؟
نجوى : لا .. خد حبوب .. وبقى يشهق ويقول أى أى ..
يسرية : ماتخافيش يابنتى .. بابا فاهم كل حاجة
وحيقف جنبك لحد ماتنتهى الأزمة ..
عبدالستار : أه .. يبقى ما أروحش الشغل النهاردة ..
يسرية : يعنى إيه ؟
عبدالستار : مادام فيه أزمة ! نشوف الأزمة .. (ينظر فى
الساعة) ستة وربع .. يادى اليوم الأغبر ..
(يجرى إلى الباب) سلاموعليكو ..
(يخرج)

نجوى : (تمسح دموعها) ليه ياماما قلتيله ؟
يسرية : أمال يابنتى اسيبه يقول ما بيخطبهاش ليه ؟ ما
بيكلمنيش ليه ؟ وغيره ألف رايعين جايين على
مكتبه ؟

نجوى : كنتى استنى لما الأزمة تفوت ..
يسرية : يا بنتى انت مصدقة ان دى أزمة وتفوت ؟
نجوى : طبعا ياماما .. كل واحد ممكن تمر عليه حالات
زى دى ..

(يقرع جرس الباب ويدخل كمال)
كمال : أدي البونبونيرة بحالها .. مالفيتش غطا
لوحده .. قمت قلت أهى تنفع ..

يسرية : مرسى ياكموله يا حبيبي .. تسلم ايدك .. فكها
بقى وخش حطها مطرحها وهات لى القديمة ..

(يدخل وتدخل وراءه نجوى)
هات القديمة أشوف لى فيها صرفة .. سامع ؟
كمال : (خارجاً ومعه البونبونيرة) أهه ..
اتفضللى ياماما ..

يسرية : مرسى يابنى يابن الناس الطيبين .. بقول
إيه .. الساعة بقت تمانية والدنيا ليل .. مش
احسن برضه من غير مطرود تروح ..

كمال : وهو أنا صغير ؟ أنا أتأخر على مزاجى ؟
نجوى : ماما خايفة على أهلك يقلقوا .. (فى رقعة)
أهلك ويبحبوك ..

كمال : وأنا بحبك إنتى ..
نجوى : (تتصنع الخجل) ياي ياي .. كمال !
كمال : انتى اللى مكسوفة أهه !
يسرية : وتيته؟
كمال : تصبجى على خير ياماما .. باى باى .. باى
باى ..

(يخرج)

يسرية : عرفتى ليه أنا قلت لبابا ؟
نجوى : موش فاهمة !
يسرية : عشان لما يجى فاروق يطلب إيدك رسمى يبقى
بابا عارف ان مافيش بينك وبين كمال حاجة !
نجوى : فاروق ؟ ياخبر ؟ هو كلمك ؟
يسرية : فاروق بيكلمنى كل يوم .. وأنا زى ماتقولى
عماله أمطوح فيه .. بس لإمتى بقى ؟
نجوى : (فى انفعال) فاروق ؟
يسرية : قلت له الشقة موش عاجبانى راح مغيرها
وجاب اللى طلبتها ..
نجوى : اللى فى مصر الجديدة ؟
يسرية : الأرضى اللى حواليتها جنيّة !
نجوى : وفرشها ؟
يسرية : أmaal كنتى فاكرانا إحنا اللى حنفرشها على
معاش بابا ؟
نجوى : وماقلتيلش ليه ياماما ؟

يسرية : أقول لك ايه وأعيد لك إيه ؟ الراجل محترم
نفسه ومش عايز يفتح بقه الا لما يضمن الرد ..
نجوى : (سارحة) والعربية ؟
يسرية : دا غيرها تانى يوم .. نجوى قالت ما احبش
الفيات النهاردة كات اليابانى قدام البيت
بكرة .. وما تسألينش ماركتها إيه ؟
نجوى : تويوتا ؟
يسرية : وبعدين معاكى يانجوى .. أهو جاي يوم
الخميس يشوف والدك رسمى هو والعيلة
وانتى بقى اتصرفى !
نجوى : أنا أتصرف ؟ اتصرف ازاي ؟
يسرية : على الأقل طرقي كمال أفندى بتاعك لحد
مايمشوا ..
نجوى : أطرقه ازاي ؟
يسرية : يعنى وزّعيه .. اعتذريه . قوليله عندنا حفلة ..
عندنا طهور .. سبوع ..
نجوى : اقول له خارجين ؟
يسرية : اتصرفى .. بس بحيث فاروق وعيلته يعرفوا
يتكلموا مع والدك .. على راحتهم ..
نجوى : أخده السينما ؟
يسرية : انتى عبيطة ؟ انتى لازم تكونى موجودة هنا ..
نجوى : وكمال يروح فين ؟
يسرية : (تغير نبراتھا) ما قلتك اتصرفى !

نجوى : أكذب عليه ؟
يسرية : ممكن !
نجوى : أقول له ماباحكش ؟ ماقدرش .. دا كان يموت
نفسه .. وبعدين (فى حاله انهيار واقتراب
من والدتها) أصلى باحبه قوى يا ماما ..
باحبه قوى وما يهونش على !
(تبكى بحرارة)
(إظلام وإنارة - نفس المشهد)
يسرية : (تقبل نجوى) مبروك يا بنتى .. ألف ألف
مبروك ..
نجوى : (وهى تبكى) شايفة يا ماما جاب لى
إيه ؟ (تريها الأسورة الألباس)
يسرية : شافها بابا ؟ شفت يا عبد الستار ؟
عبد الستار : يامنت كريم يارب ! بنتى الوحيدة بعد ثلاث
شياطين ! صحيح .. البنات رزقهم واسع !
يسرية : خشى شيلها يا حلوة فى الدولاب فى
الشكمية اللى ع الشمال .. واقفل عليها
كويس أحسن حد يشوفها والا تنتظر كده
والا كده ..
نجوى : بعدين يا ماما .. أما أفرح بيها شوية ..
عبد الستار : دانا سألت على فاروق ده لقيته كسيب نمره
واحد ..
يسرية : طول عمرك تقول « الكاسب حبيب الرحمن » ..

عبدالستار : موش أنا اللي بقول يايسرية ..
نجوى : أكلم كمال بقى أقول له ييجى ؟
عبدالستار : كمال ؟ ييجى الليلة ؟ ليه تانى ؟ انتى موش
قتليه إن احنا مشغولين
نجوى : ووعده اضرب له تليفون ..
عبدالستار : ليه ؟ بمناسبة إيه ؟ عشان يهنيكى على
خطوبتك ؟
نجوى : بابا أنا موش جايلى نوم وعايظه حد اتكلم
معاه .. انتو موش ممكن تفهمونى ..
يسرية : كبرنا عليكى يمكن ..
نجوى : أيوه كبرتو على .. أنا عايضة حد فى سننى ..
حد يفهمنى وأفهمه ..
عبدالستار : تلاغيه ويلاغيكى !
نجوى : (صارخة) بابا - قصدك إيه بالكلام ده ..
طب والله ما أنا قاعدة فى البيت .. وحدى
ياست ماما .. افرجى بيها (تقذف إليها
بالإسورة) .. حنطيهها .. برورزيها هى وسى
فاروق بتاعها .. تصبجوا على خير ..
(تخرج)
(إظلام واضاء)
كمال : (داخلا) نجوى نجوى .. بابا .. ماما ..
عمى ..
يسرية : إيه يا كمال يابنى .. كنت فىن إمبارح ؟ قلبنا
عليك الدنيا !

كمال : ما انتو كنتو مشغولين !
يسرية : أيوه بس نجوى قالت حتديك تليفون !
كمال : ماضربتش خالص .. لحد نص الليل ..
يسرية : واحنا قعدنا طول الليل ندور عليك .. وعليها ..
كمال : وعليها ؟ ليه هي فين ؟
يسرية : الله أعلم يا بنى .. عمك نزل يدور عليها ..
كمال : سأل فتحية أختي ؟
يسرية : قالت له ماشافتهاش ..
كمال : لا .. لازم نجوى اللي قالت لها تقول كده .. هي
مؤكد عند فتحية .. وزمانهم الاتنين جاين علينا
دلوقتي .. ياترى عملت كده ليه ؟
يسرية : أهو إنت عارف نجوى .. ساعات تطلع عليها
جنونتها ..
كمال : لا لا لا .. البيات بره مش مسألة جنونة - دي
لازم زعلة كبيرة قوى .. أنا حاعرف لك السبب
ان شاء الله ..
يسرية : انتو ماتخيوش حاجة على بعض أبداً ..
كمال : ونخبى ليه يا ماما ؟ دي نجوى دي - (في
خجل)
يسرية : عارفة يا كمال .. زى أختك بالظبط ..
كمال : أختي ؟ لا .. أكثر .. دي حياتي .. دي
روحي ..

يسرية : عشان متربين سوا من أيام المدرسة ..

كمال : مدرسة إيه يا ماما ؟

يسرية : أقصد يعنى ان إحنا طول عمرنا جيران ..

وأخواتك البنات صحابها .. وأخواتها الصبيان

صحابكم ..

كمال : أنا حاخذ البسكليت واروح أشوفها !

يسرية : ابن حلال مصفى .. البسكليت مكسورة ولازم

تتصلح .. (تضحك) ومين حيلحها غير

كمولة ؟ (تدله كالطفل) كمولة حبيبتى ..

يالله يا حبيبي ..

كمال : هي فين دى ؟ أه .. اللى فى الركن دى ؟

ماشى ..

(إظلام وإنارة)

عبدالستار : (فى ملابس المنزل) دى أول مرة وآخر مرة

أغفر لها تبات برة .. وياريت عند حد م

العيلة ..

يسرية : ماكامل شرح لك فتحية تبقى بالنسبة لها إيه !

عبدالستار : هي كلمة .. يا إما نجوزها بكره وجوزها يبقى

مسئول عنها ..

يسرية : كفاية بقى البت عيطت لما اتفلقت م العياط ..

عبدالستار : والباشا خلص أشغاله ؟

يسرية : إخص عليك ياعبده .. دا صلح لنا البوتاجاز

خلاه مافيش كده .. زى ما تقول هم وانزاح من

على قلبى .. من يوم ما اشتريناه والعين
الخامسة دى مقفولة زى ما يكون معمول لها
عمل ! تصور يا عبده النهارده اشتغلت وحطيت
عليها المحشى عشان يتسيك ؟
عبدالستار : أكل بعقلك حلاوة انتى كمان ؟
يسرية : ليه بقى ؟ إنت فاكركنا هبل ؟ عارفة نجوى راحت
فين دلوقتى ؟
عبدالستار : ماقلتش .. لسة بدرى !
يسرية : راحت تشوف الشقة الجديدة
عبدالستار : مع فاروق ؟
يسرية : (تشير إليه أن اخفض صوتك) وبالمرة
حيعدوا على بتاع الحمامات الطليانى ..
ووعدتنى تيجى قبل كمال ما يخلص المطبخ !
عبدالستار : والله ان كيدكن عظيم !
(نجوى داخله فى حالة فرح شديد)
نجوى : ماما .. ماما .. بابا .. بابا .. انتولازم تيجو
معانا ان شاء الله يوم الجمعة ..
(كمال داخلا)
كمال : وأنا كمان ؟
نجوى : (فى سعادة طاغية) كمولة ؟ لا يا حبيبى
إحنا حنروح يوم تانى ..
كمال : شفتى المطبخ ؟
نجوى : النهاردة ماكانش فيه وقت .. شفت الحمام !

كمال : لكن أنا لسه ماقربتش م الحمام !
يسرية : أصل كمال صلح لنا البوتاجاز وشغل العين
الخامسة ..

عبدالستار : شوف يا كمال يابنى .. مشكلة الحمام دى
رهيبه - فى وسط الدش تنزل الميه بارده ..

كمال : ده عشان الترموستات ياعمى .. ساعات سلك
واحد والافيز بيوظ العملية كلها ..

يسرية : وحتعمله ياكموله ؟

نجوى : طبعاً يا ماما .. كمولة مايئاخرش عن حاجة
اطلبها ابدأ ..

كمال : اطلبى عيني .. اطلبى قلبى .. اطلبى حياتى ..

يسرية : يا عيني على الا ماحد قال لى اطلب حاجة !

عبدالستار : استغفر الله العظيم .. ياولية انتى ناقصك
حاجة ؟

كمال : (يسحب نجوى من يدها) تعالى أوريكى
المطبخ بقى شكله إيه !

(يخرجان راقصين)

عبدالستار : البت دى طالعة ألبان لمن ؟

يسرية : نعم نعم نعم ! لأ ياسى عبده لأ .. شوف مين
بيكلمك !

إظلام وإضاءة

(كمال مرتدياً لبس النقاشين وواضح أنه
انتهى من دهان الشقة)

كمال : حاسبوا وانتو بتخطوا الطريقة .. لسه البلاستيك طرى ..

عبدالستار : الله ! إيه ده ؟ دى الشقة نورت !

نجوى : بنورك يا بابا ..

يسرية : الواد كمال ده عفريت بصحيح ..

نجوى : فين هو كمولة ؟ ياريتك كنت معنا النهارده !

كنت شفت العجب ..

كمال : كنتو فى زيارة ..

يسرية : واحد صاحبنا بيفرش شقة ..

نجوى : داهن البيبان زيت بحيث انه مسحة واحدة تخليها تلمع ..

كمال : طب أنا والبيبان بكرة إن شاء الله ..

نجوى : بكرة بكرة ..

كمال : أيوه ليه ؟

نجوى : بكرة بكرة .. يعنى بكرة ؟

كمال : الله .. فيه ايه بكرة ؟

نجوى : كنت عايزاك تيجى معاى تشوف محل الرسم الهندسى اللى عايزين نجيبه ...

كمال : رسم هندسى إيه يانجوى ؟ حد يسحب البيبان دى شكلها كده -

نجوى : (تقاطعه) لكن أنا اتفقت مع صاحب المحل على بكرة ..

كمال : آسف يا نجوى .. روحى انتى وقولى لى
رأيك .. أنا موش ماشى اللى اما اخلص ...
(اظلام واضاءة)
(المنظر مائدة حافلة ويجلس حولها
أفراد العائلة جميعاً + كمال وفتحية .
فاروق)

فاروق : بصراحة أنا فى حياتى مادقت طورلى جميل
كده ..

عبدالستار : ولا عمر يسرية طبخته حلو كده !
فتحية : دى وصفة سرية .. شوفى تبيعيها لنا بكام ؟
يسرية : أقول لكى الحق بقى .. موش أنا اللى عامله ..
نجوى : إيه يا ماما ..
يسرية : كمال يانجوى .. أهه قدامكو .. إسألوه ! ..
فتحية : موش ممكن .. كمال أخويا ؟ .. العبقرية فى
العيلة وما احناش عارفين ؟
عبدالستار : الحقيقة اليومين دول كمال مالى علينا البيت
ومنور شمعنا ..

نجوى : بابا .. كمال بيتكسف ..
فاروق : الله ! عجيبة دى .. ده وشه أحمر فعلاً !
عبدالستار : ماتسألش فيهم ياكمولة ..
كمال : الله .. عمى .. وبعدين ..
نجوى : (تأخذه من يده) ماتتكشفش ياكمولة ..
تعالى يا حبيبى .. (إلى الجالسين) نجيب

لكم الحلوهنا والا فى الصالون ؟ اتفضلوا ..
اتفضلوا ..

الجميع : (وهم ينهضون) أيوه أيوه فى الصالون ..
يالله بينا .. يالله بينا ..

نجوى : أنا عايزه استفرد بيك شوية يا كمولة !
كمال : وبعدين معاكى بقى .. أنا بقيت حاسس إنى
غريب ! دا بيتريق علىّ وده بيضحك من
ورايا .. معقولة دى ؟

نجوى : مين قال كده يا كمال ؟ ازاي تقول كده ياكمولة
ياروحى ..

كمال : والله .. هه .. دا حتى ماما لما تشوفنى لابس
العفريّة تقول لبست البربطوز ؟

نجوى : دى يتهزر معاك يا شيخ .. تعال تعال .. أنا
عندى أخبار عايزة أقولها لك .. عارف صاحب
مكتب الرسم الهندسى اللى قتلتك عليه ؟

كمال : ماله ؟

نجوى : أبدا .. عايز يشغلنى عنده ..

كمال : تصميم والا تنفيذ ؟

نجوى : لا كده ولا كده .. مساعدة المدير ..

كمال : يا خبر ! برافو !

نجوى : وعارف المدير بيبقى مين ؟ (بدلال ومفاجأة
لاعبة) ببقى فاروق اللى جوه ده !

كمال : مش معقول !

نجوى : إيه رأيك بقى فى حبيبتك ؟
كمال : دى حياتى .. وروحى ..
نجوى : عايزين نعمل للراجل بقى حفلة عظيمة .. بس
يا خسارة .. البيت مش نظيف والستائر
كمال : (مقاطعاً) أنضفه .. هو أنا بتأخر ؟ قولى
يوم إيه ويكون البيت زى الفل .. لما ماما قالت
لى ع الأكل أنا ما اتأخرتش .. نجوى تؤمر بس
وأنا تحت امرك

نجوى : يا حبيبى يا كمال ! ..

كمال : يا حبيبتى يا نجوى !

(يتعانقان)

(إظلام ونور)

يسرية : (تنظر حولها) هوراح فىن ده ؟ (تنادى)

انت رحت فىن ياكمال ؟ رحت فىن ياكمولتى ؟

كمال : (يخرج من تحت الأريكة) فيه حاجة

ياماما ؟

يسرية : يالله يا حبيبى خلص الصالون الأول عشان

الراجل ..

كمال : لا يا ماما لأ .. الأركان أهم حاجة .. الناس من

غير ماتاخدى بالك ببيصوا فى الأركان ..

يسرية : (تضحك) دمك خفيف ياكمولة ..

كمال : أنا باتكلم بجد .. آخر مرة نجوى كانت هنا

قالت لى خللى بالك م الأركان .

يسرية : أيوه .. أصل نجوى نسيت البيت من ساعة ما
اشتغلت عند الراجل الجديد ده ..
كمال : بس بصراحة بقى أنا مش عاجبنى بياتها
برة ..
يسرية : ليه ؟ مش إنت اللي كنت بتدافع عنها لما باتت
عند فتحية ؟
كمال : دى حاجة تانية .. فتحية أختى !
يسرية : وفاروق ابن خالتي ! عيلة واحدة !
كمال : والله العظيم ؟
يسرية : أمال إيه ! وعيالهم وعيالنا زى الاخوات !
كمال : طب عن اذنك أشوف الصالون ..
(يدخل عبدالستار)
عبدالستار : واد يا كمال .. واد يا كمال !
كمال : (يظهر) إيه يا عمى خير ؟
عبدالستار : حبيجي الخير منين ؟ دى الجزمة اللي قتلتك
امسحها ونضفها ولعها ؟
كمال : ما لها ياعمى ؟
عبدالستار : بص .. شوف .. مالها !
يسرية : معلش يا عبده .. سيبها وهو يعملها دلوقتى
.. الله يكون فى عونہ .. طول النهار بيوضب
فى البيت عشان الراجل ..
عبدالستار : وأنا مالى أنا ومال الراجل بتاعكوده ؟
يسرية : إزاي بقى ؟ إنت نسيت والا إيه ؟

عبدالستار : قصدك شغل نجوى .. ياستى .. فيه حاجات
أهم .. امسكى (يخرج لها أوراقاً) بتبص
على ايه ياكمال عندك ؟ روح شوف شغلك ..
(يخرج كمال)

يسرية : بالحق الأول يا عبده .. حرام عليك تشخط فى
الولد كده .. ماتنساش انه ابن جيراننا
وحبابينا القدام واحنا برضه زى عيلته .. ابن
أتراك وأرستوقراطى وحرام نعمل فيه كده ؟
عبدالستار : لا يا شيخة ؟ ومين اللى قال نستفيد بيه بدال ما
هو قاعد يعاكس نجوى ؟ مش انتى اللى قلتى
يشتغل بأكله ؟ ومين اللى قال لو عنده دم كان
طفش ؟ !

يسرية : أنا قلت كده ؟ تف من بقك يا عبده ..
عبدالستار : وحياة دى النعمة قلتها (يعطيها المال)
يسرية : ايه ده كله ؟
عبدالستار : مهر نجوى !
يسرية : من مين ؟
عبدالستار : يعنى حيكون من مين ؟ من فاروق طبعاً !
يسرية : وإزاي تقبل ؟
عبدالستار : ما أقبلش مهر بنتى ؟
يسرية : بعد كل اللى دفعه واللى عمله لنا ؟
عبدالستار : الراجل مقتدر والمال عصب الحياة .. شيلى
شيلى .. ماتعديش دلوقتى أحسن الفلوس
تنقص ..

(تدخل نجوى مسرعة)

نجوى : بابا .. ماما .. فين كمال ؟

عبدالستار : بيمسح البلاط (يضحك ساخراً)

يسرية : فى الصالون يا حبيبتي ..

نجوى : عايزاه ضرورى ! (تراه منكباً على الأرض

ينظف الأركان) يا حبيبى ياكمال ! إنت

بتعمل إيه ؟

كمال : (خارجاً من الصالون) بنحضر حفلة

الراجل !

نجوى : أقصد على الأرض ؟

كمال : (لا يرد خجلاً)

نجوى : ماما .. بابا .. لو سمحتوا ..

(ينصرفان)

جرى ايه ياكموله ياروحى ؟

كمال : انتى مش فاكرة لما نبهتيني آخر مرة على

حكاية الأركان ؟

نجوى : ياسلام عليك .. ماتنساش حاجة أبداً ..

كمال : خفت لاتزعلنى منى ..

نجوى : أنا أزعك منك ؟

كمال : ساعات أتخيل انك زعلتى منى .. وساعات

أفضل اضرب فى نفسى واقول ليه يا ولد تعمل

كده .. ازاي ياكمال تزعل نجوى .. نجوى المثل

الأعلى .. نجوى فينوس الطاهرة .. نجوى اللى

هى نجوى الليل والنهار ..

نجوى : كلامك حلو يا كمولة .. وماما مبسوسة منك

بشكل ..

كمال : وأنا بحب ماما قوى ..

نجوى : نفسها لما اتنقل عند فاروق انك تعيش وياهم

هنا ..

كمال : وإننى مش حتبقى تيجى ؟

نجوى : لازم ياروحى .. بس إنت عارف الشغل بقى ..

واهى عيلة واحدة .. بس بشرط ..

كمال : امرى

نجوى : إنك تعيش هنا معاهم ..

كمال : يا سلام .. ده يوم المنى !

نجوى : ساعتها أحس إنى سايبة ورايا راجل .. روح

واحدة فى جسدين ..

كمال : قلبين فى جسد واحد ..

نجوى : ازاي بقى ؟ ماينفعش ياكمولة ! يتلخبطوا فى

الدق !

كمال : (يضحك) واحد يدق والثانى يخط !

نجوى : (تضحك) إلهى يحطك !

كمال : ضحكك عندى بالدنيا .. ارضى عنى بس

يانجوى وأنا أبقي أسعد إنسان فى الكون ! أنا

أعمل أى حاجة .. من إيدك دى لايدك دى ..

مش بس عبيد .. ولا بس خدام .. حشرة ..

حيوان .. شئ ..

نجوى : اخص عليك يا كمولة يا حبيبى .. ايه اللى

بتقوله ده ؟

كمال : زى ما بقولك بالظبط .. أنا روحى ليكى .. بس

أطلبى ..

نجوى : خلاص .. اتفقنا .. حتعيش انت مع بابا

وماما .. وأنا حاعيش مع فاروق شوية كده

ونشوف الموقف إيه ..

كمال : نجوى حياتى ..

نجوى : كمال حبيبى ..

كمال : إحنا مش محتاجين نشوف الموقف إيه ..

الموقف واضح .. حبنا لا يعتمد على مواقف

ومالوش علاقة بالظروف المتغيرة .. انتى زى

ماكنت باقول لزمائلى .. ولعيلتى قبل ما

اسيبهم .. انتى الجمال المثالى .. انتى المثل

الأعلى اللى لازم يدوب فى حبه ناس كتير ..

وأنا فاهم ده وعارف معنى الناس الكثير اللى

انتى مصاحباهم ..

نجوى : ناس كتير مين ياكمال .. انتى فاهمنى غلط ..

كمال : شوفى يا نجوى .. طول عمرى أقول أن الجمال

الخارق حرام يتحبس فى حب واحد بس ..

مهما كان الواحد ده كبير أو عظيم ..

أو جدير به وبس .. لا .. الجمال الخارق لازم

الناس كلها تستمتع بيه .. لازم الحياة كلها

تستمد منه معانى حلوة .. الهام .. مش للفن
بالضرورة .. لكن للحياة .. للاستمتاع بالدنيا ..
وعلاقتى بيكى كات م الأول كده .. كنت سايبك
تعملى اللى انتى عايزاه .. لأن اللى انتى عايزاه
الدنيا عايزاه منك !

نجوى : أنا النهاردة موش فاهمك ياكمولة ..

كمال : ركزى معاى وانتى تفهمى ..

نجوى : بأحاول .. بأحاول يا حبيبى !

كمال : (يضحك) شوفى يا حبيبتى .. احنا عيلاتنا
بينهم مشاكل .. ولسوء الحظ استغلوا حبنى
الجارف فى اذلالى بالتدريج وأنا كنت منساق
زى الأعمى اللى يبجر الطاحونة لحد ما لقيت
نفسى بامسح البلاط ..

نجوى : ماكانش له لازمة ياروحى ..

كمال : لوكنت فقت وقلت ان حبك ده كان وهم .. انك

ماتستاهلش ان حد يحبك ولا يضحى فى

سبيلك كان الموقف مختلف .. لكن .. بكل

أسف .. ماقدرش اتخلى عن حبك ولا إعجابى

بجمالك الباهر .. الإلهى .. السماوى ..

نجوى : وأنا مقدرة ده يا كموله .. وعمرى ما عملت

حاجة تجرحك ..

كمال : ده يبقى إنسان غريب اللى يشوف حبيبته

هاجره ومايحسش بالجرح ..

نجوى : مين قال إني هجرتك .. أمال أنا دلوقتي إيه ؟

كمال : دلوقتي إنت مرأة فاروق !

نجوى : لا يا كمال .. ماحصلش ..

كمال : أنا عارف التفاصيل باليوم وبالثانية !

نجوى : ماتصدقش يا كمال .. دول العزال ..

كمال : انتوفاكريني خيخة .. ناعم .. لكن حبك اللي

دخل تحت جلدي وأصبح جزء مني خلاني

نار .. كيان مدمر ..

نجوى : احنا حباب يا كمال .. ليه الكلام ده دلوقتي ..

كمال : على رأي الشاعر

وجل مرادى أن تكون هنيئة

ولو اننى ضحيت نور حياتي ؟

نجوى : يعنى إيه ؟

كمال : يعنى شغل يوسف وهبي فى غزل البنات ..

ضحى بنفسك فى سبيل حبيبك .. هو ده

الحب الحقيقى ..

نجوى : (تبدأ تخاف من النبرة) مين قال ياكمال ؟

كمال : بابا اللي رأيته أن أنا مسئول عن احذيته ..

وماما اللي رأيها ان أنا مسئول عن التنضيف

والمطبخ .. ونجوى اللي رأيها إني أبقي ازور

فاروق مرة فى الأسبوع عشان انصف لهم

الشقة ..

نجوى : دا فاروق بيعزك وبيقدرك ومحضر لك شغل في

المكتب .. ازاي تقول كده يا كمال بس ؟

كمال : ليه ؟ مش كان عايز يستلفني يوم في الأسبوع

من ماما ؟

نجوى : (في رعب) لا يا كمال لأ .. عمره ما قال

كده !

كمال : المشكلة إني كنت حاقبل .. اللي تؤمر بيه

الهانم .. لونجوى قالت لازم انفذ .. هي

الملكة .. هي الالهة (ييكى) .. المشكلة إني ما

أقدرش أخالف نجوى .. أمسح تحت رجلها ..

والأرض اللي بتمشي عليها ..

نجوى : (تمسح دموعه في رقة) كمال .. انت بتقول

ايه ؟

كمال : باقول الحقيقة يا نجوى .. يا ملاكى الجميل ..

(يحضنها وهي خائفة) ملاكى اللي باع

نفسه لمقاول ميعجر ..

نجوى : كمال .. حاسب (تصرخ الى أى .. انت

حتجرحنى ..

كمال : مش زى الجرح بتاعى .. ابقى قولى لبابا

وماما .. لازم تصدقوا كمال لما قال لكم ان اللي

مايطولوش كمال .. ماحدش تانى حيطوله !

(يخنقها بالتدريج) زى عطيل .. الفتنة

الشريرة لازم نخلص الدنيا من شرورها ..

(تقع ميتة) .. نقوم نتحرر .. نقوم نحس
بالحرية .. حتى ولو كانت النهاية ..
إفلام

ولا فى أمريكا..
مسرحية من فصل واحد

(عندما يرتفع الستار ترى حلمى وهو شاب فى الأربعين - أنيق ووسيم ويتمتع بنوع من الحلاوة التى تصيب الإنسان بالتخمة . وهو يدخل فى رشاقة ليقابل أزهار ربة المنزل فى الصالون الكبير الذى يتضمن - مثل الأفلام المصرية مكتباً وبيانو وأنتريه وصالوناً وساعات كبيرة . هذا هو الشكل المأخوذ عن منازل الطبقة الراقية فى نيوانجلند بالولايات المتحدة ، التى سخر منها كثير من الكتاب وكان يطلق عليهم البراهمة . لم يعد لدينا منهم الكثير فى مصر ولكننى عرفت مجموعة ماتزال تحتفظ بتقاليد هذه الأسر فى المعادى وفى مصر الجديدة - وعرفت نماذج الأشخاص الذين صورتهم فى هذه المسرحية وإن كنت وصفتهم فى قالب أسيركى حاولت قدر الطاقة أن أجعله مصرى النبرة واللحجة) .

حلمى : (داخلاً) هالو .. هالو .. أزهار هانم .. إيه الشياكة دى كلها ؟ معقولة ؟ كل ده الساعة ٨ صباحاً ؟ يا ترى منتظرة مين ؟

أزهـار : (فى خـجل مصـطنع) لا لا يا حلمى بيه ..
لا شياكة ولا حاجة .. ده الفستان اللى لقيته
قدامى ..

حلمى : (مداعباً) وإيه يا ترى اللى مصحينا بدرى ؟
ماجالناش نوم ؟ بنفكر فى اللى ناسينا ؟

أزهـار : (متقبلة هذا الإطراء) والله أبداً يا حلمى
ياخويا .. أنا بس قلقانة شوية على أحوالنا ..
أديك شايف .. فتحي طول النهار ويمكن طول
الليل برة ! وسونيا مسكينة فى المعهد اللى
شاغلها ده ..

حلمى : بالعكس .. دانا سامع أنها عملت سمعة
ممتازة ..

أزهـار : سمعة إيه يا حلمى ؟ مدرّسة علم نفس ؟ سونيا
بنت عمر باشا تبقى مدرّسة فى معهد
متوسط ؟

حلمى : لكن حتاخذ دكتوراة وتبقى الدكتورة سونيا ..
وإن شاء الله تتجوز العريس اللى -
(يتنحنح) يعنى .. يليق بمقام الأسرة .. هى
بقى عندها كام سنة دلوقتى ؟

أزهـار : ما انت عارف يا حلمى ياخويا .. دانت موش
صديق الأسرة بس .. دانت ولى أمر الأسرة !
(تضحك)

حلمى : أصل أنا جايب لك معايا حاجة حتفرحك
وتخليكى تعيدى النظر فى كلامك ..
أزهار : خير .. خير يا حلمى ..
حلمى : (يقدم إليها بنطنطيف Pendentif)
الباندانتيف !
أزهار : (فى رنة فرح غامرة) حلمى ! (تكاد
تحتضنه ولكن تقف فى آخر لحظة) موش
معقول !
حلمى : إيه رأيك بقى ؟
أزهار : دا زى الحلم !
حلمى : ربع مليون جنيه !
أزهار : دا تمن الأمانة دى بس !
حلمى : أخرج أنا بقى على ما تشيليه فى الخزنة !
أزهار : يا خبر ! هوانا حاستخونك يا حلمى ؟
حلمى : معلش .. أنا حاغمض عيني عشان ماشفش
النمر السرية !
(ترفع صورة من الجدار وتدير قفل
الخرزنة وتضع البنطنطيف)
حلمى : كنتى مصدقة إنى أرجعه بالسرعة دى ؟
أزهار : كنت عارفة إنك حترجعه طبعاً .. زى مارجعت
كل حاجة قبل كده ..
حلمى : لكن بالسرعة دى ؟
أزهار : جات لك فلوس بسرعة عشان تفك الرهن ؟

حلمى : شوفى يا أزهار هانم .. السوق ماحدش
يضمنه .. وإحنا الحمد لله الحظ ساعدنا ..
عزبة البدرشين جهزت .. وبدأت تغل ..
وحضرتك وثقتى فى ثقة مطلقة ..
أزهار : فتحي جوزى هو اللى وثق فيك وقدمك للأسرة
هدية لا تقدر بثمن ..

حلمى : (يتصنع الخجل) العفو يا مدام أزهار
أزهار : أنا بأقول الحق .. أنا ماكنتش الأول أصدق
حكاية صديق الأسرة دى .. قلت دى بدعة
أمريكانى .. لأنه مش معقول واحد يصاحب كل
أفراد الأسرة ..

حلمى : بالعكس .. إحنا عندنا فى مصر ولا فى
أمريكا .. بنلاقى ربة البيت مصاحبة واحدة
وبسرعة تبقى صديقة الأسرة كلها ..

أزهار : ما هى دى حالات حالات .. لكن -
حلمى : (يقاطعها) مدام أزهار ! أنا لازم أصارحك
باللى فى قلبى .. بس خايف .. متردد ..

أزهار : حد يخاف من أصدقائه ؟ إزاي ؟
حلمى : أصل طلبى جريئ .. مش عارف أوصفه
إزاي !

أزهار : مهما كان .. أرجوك قول !

حلمى : سونيا .. أنا عايز سونيا ..

أزهـار : (تصاب بخيبة أمل) أه .. عايزها .. يعنى

طالب إيدها ؟

حلمى : أنا عارف إنى إتجرات ودخلت منطقة -

أزهـار : بالعكس ! ده يشرفنى .. بشرط واحد ..

حلمى : ألف شرط وشرط ..

أزهـار : انك تكشف لى الأول فتتحى بيروح فين من

ورايا .. بيعمل ايه من وراضهرى !

حلمى : فتتحى بيه راجل متحضر .. وكان صديق

وقريب عمر بك صبرى .. زوج حضرتك وأبو

سونيا ..

أزهـار : الله يرحمه ..

حلمى : يبقى مش ممكن يكون فيه شك .. بالعكس ..

داكان عندى أمل نقنعه يوافق على جوازى من

سونيا ..

أزهـار : لا يا حلمى بيبك .. سونيا بنتى أنا - وأنا بس

اللى لى كلمة عليها ..

حلمى : مدام أزهـار أنا تحست أمرك ..

(بالفرنسية) Je vous en prie

أزهـار : انت tres gentil مسيو حلمى ..

حلمى : أقول أوريغوار ؟

أزهـار : (فى خيبة أمل) يعنى مش حنتقابل النهارده ؟

حلمى : مدام أزهـار a votre service - دايما .. toujours

خساره ان مدموازيل سونيا نايمه لحد

الوقت ..

أزهـار : وخسارة أن فتحي خرج من الساعة سبعة !
حلمى : أوريـفوار .. (يقبل يدها وهو راكع)
أوريـفوار

أزهـار : (يخرج)
ولا فى أمريكا ..

إظلام

(نفس المشهد - مساء - سونيا جالسة

على المكتب)

حلمى : (وحدها) هى دى المشكلة ! فصل الإنسان
عن البيئة ! علماء آخر زمن .. يطبقوا نتائج
أبحاث أمريكانى على ناس عايشة فى الهند
والا فى مصر ! أنا حابدا أكفر بعلم النفس ..
موش ممكن .. (تغلق الكتاب وتضعه على
المكتب) إحنا عايزين نعمل نوع جديد من علم
النفس .. نشرح إزاي تركيبة صديق الأسرة ؟
عمو حلمى ؟ مهذب .. ورشيق .. ووسيم ..
وجميل .. وحلو .. لكن -

(تدخل منيرة الخادمة وهى صغيرة

وريفية ونموذج للسداجة)

منيرة : فيه حاجة ياستى ؟

سونيا : خير يا منيرة .. إنتى عايزه حاجة !

منيرة : لو حضرتك موش عايزة حاجة

سونيا : شوفى يا حبيبتى .. إحنا لوحدنا الليلة فى

البيت .. ماما خرجت زى ما إنتى عارفة ..
وبابا اتكلم وقال حيبات برة .. وععباس
الجنابنى قال راح يشوف بنته اللى جابت له
ولى العهد ..

منيرة : ولى العهد ؟

سونيا : (تضحك) جابت ولد يعنى .. (فجأة)
عايزة تنامى دلوقتى ؟

منيرة : ياريت ياستى !

سونيا : تقفلى الباب عليكى كويس ؟ وتطفى النور ؟

منيرة : عينى ياستى !

(تخرج)

سونيا : يقولوا لى علم النفس ! أنا لازم أقلب إجتماع ..

حتى علم النفس الاجتماعى مش كفاية ! الله

يرحمه يوسف مراد ! كان دايماً يقول لنا إحنا

لسه بندور على منهج تكاملى ! منيرة اللى

ماحدث شافها فى هذه المدينة الشاسعة

(تمثل أستاذاً يتحدث فى محاضرة)

يريد أن يتزوجها الجميع دون أن يروها ..

(تعود إلى صوتها الطبيعى) وأنا اللى

كل يوم والتانى فى حفلة وإلا فى محاضرة

عامة فى المعهد .. والبيت كله أصدقاء عائلة -

كل الخلق دى كلها .. يسيبونى لما أعدى سن

الـ (تضحك) أنا عديت والا ماعدتش ؟

زمايلى فى المعهد عدوا .. كلهم أكبر منى ..

وكلهم حبايبي ولسه بنتقابل .. إلا واحد والا
إثنين ! كنا دفعة إيه ! ياترى هم فين ؟ محمود
البلشاني .. محمد أبو هرجة .. فريد مراد ..
لازم هاجروا .. لا .. مافيش طلب على خريجي
علم النفس .. تلاقيهم اشتغلوا بالأعمال الحرة
زى مصطفى الزغبى ..

(يدخل فجأة شخص ملثم من اليمين)
وبيده مسدس ويطلق طلقة فى الهواء
يرتج لها المسرح ثم يواجه سونيا)
الملثم : اسمعيني كويس - المسدس لسه فيه خمس
طلقات ..

سونيا : (تدور بها الأرض) خمس .. خمس .. آه ..
آه (تقع مغشياً عليها)
الملثم : قومي يا بنت إنتى بلاش دلج .. قومي ..
(لا تتحرك سونيا فيجربى إلى الخارج)
ويحضر كوب ماء يلقيه على وجهها)
فوقى .. سامعة ؟ .. فوقى بقولك ..

سونيا : (تفتح عينيها ثم تغلقها من هول ما ترى
ثم تقوم) أنا باحلم يا أستاذ مش كده .. حلم
يقظة يا أستاذ ؟ مش كده ؟ وخیالى بيصور لى
هجوم مسلح ..
الملثم : أنا موش عايز هزار ولا تضییع وقت ..
المسدس ده فيه خمس رصاصات ..

سونيا : خمس .. خمس .. (يغمى عليها ثانياً)
الملثم : وده نكد إيه ده ؟ فوقى يا بنت لا والله أكتفك ما
تعرفى تنطقى ولا تتحركى .. (يخرج حبلاً
من جعبته - سونيا تفيق) أهه .. يا لله ..
سونيا : مين .. مين .. إنت مين ؟ عايز إيه .. قول ..
أرجوك .. دمي نشف !
الملثم : إخرسى خالص واسمعى الكلام ..
سونيا : أخ .. أخ .. أنا أخرس ؟!
الملثم : أكملك يعنى ؟ (يهجم عليها بشريط لاصق
وكمامة)
سونيا : يا لهوى دا بصحيح .. دا دا دا ...
الملثم : (بأعلى صوته) إخرسى ! لا يمكن حد
يسمعك ولا يسمع طلقات النار .. يعنى أقدر
أديكى رصاصتين
سونيا : (فى ذهول مستمر) تدينى رصاص ..
رصاصتين ؟
الملثم : ولا من سمع ولا من درى .. فاهمة ؟ لكن أنا
عايز الحادث ده يكون درس .. وعشان كده
مش عايز أقتلك !
سونيا : تقتلنى .. يانهار اسود .. دانا روحى حتطلع
من الدهول !
الملثم : لا حلوة ! عمرك ماسمعتى عن جريمة السطو
المسلح ؟ الكتب دى كلها مافيهاش ذكر للجريمة
دى ؟

سونيا : أيوه .. فى الكتب .. لكن ..
الملثم : مش فى الواقع .. ومش ليينا إحنا .. دى حاجات بتحصل للناس التانيين ..
سونيا : (تكون قد تحركت بحيث أصبحت تقف بحذاء المكتب وأخذت تناور كى تمد يدها لضرب الجرس) تمام .. تمام ..
الملثم : (يضحك) موافقانى سيادتك ؟ (يشير إلى الجرس) إضربى الجرس .. إضربى .. حاولى .. إنت متوقعة واحد محترف زى ينسى يقطع الأسلاك قبل مايخس فيلا منورة ووسط العمار ؟
سونيا : أسلاك إيه ؟ يانهار موش فايت !
الملثم : كويس انك واخدة بالك معاى والذهول راح .. يالله بقى ع الخزنة ..
سونيا : خزنة إيه ؟
الملثم : خللى بالك .. أنا صبور وكل حاجة .. إنما للصبر حدود .. يعنى حاهودك مرة واثنين وبعدين الثالثة حاشد الزناد واخلص منك ..
سونيا : أنا ماقصد يش أدايقك لكن باسأل بصحيح .. بجد ..
الملثم : ما تقوليها .. قولى ما تتكسفيش !
سونيا : أقول إيه ؟
الملثم : عبارتك المشهورة دى بون فوا (de bon fois)

سونيا : (تضحك لأول مرة) ياخبر .. دانت هایل
الملثم : بس .. بلى هایل بلى مایل .. ع الخزنة ..
سونيا : أصل بس المفتاح
الملثم : أدى المرة رقم ١ ... الثانية حاصبر والثالثة
مافيش
سونيا : رقم واحد إية يا أستاذ .. قصدك أية ؟
الملثم : قصدى فى الملاوعة .. الخزنة من غير
مفاتيح .. لكن بأرقام سرية .. ولو قلتي أنك
موش حافظة الأرقام يبقى حاعتبرها رقم ٠٠٢
سونيا : وعند رقم ٣ ؟
الملثم : فيه ناس مايصدقوش إلا يتعوروا .. وأول ما
الرصاصه تسيل الدم ويبدأوا يحسوا بالآلم
يعرفوا إن الله حق .. (يصوب نحو ساقها)
طلقة فى الساق اليمنى
سونيا : استنى استنى طلقة أية ..
الملثم : مش حتتشوه .. ويعدين ما انتى مغطياها على
طول ..
سونيا : (تصرخ فى هلع) استنى استنى أرجوك ..
الملثم : ع الخزنة ؟
سونيا : (تبلع ريقها) ع الخزنة ..
(تسير نحو الخزنة وهى خلف لوحة
فنية على الحائط - تزيل اللوحة فيرى
الخزنة)

الملثم : ابعدي انتى بقى .. قولى ايه الأرقام .. قولى
أحسن والله ..
سونيا : (تبكى) باحاول أفتكري يا أخى .. (تنهذه)
ادبنى فرصة بس أشم نفسى ..
الملثم : (ينظر فى الساعة) أنا اتأخرت .. ولو
اتأخرت بعد كده دقيقة واحدة الجدول بتاعى
حيثخبط وحاضطر أقتلك دفاعاً عن النفس ..
سونيا : دفاعاً عن النفس ؟
الملثم : يعنى عشان أنقذ نفسى .. كلام ماتفهميهوش
انتى .. هيه ؟ أفتكرتى .. (يصوب المسدس
نحو رأسها ويستعد بحقيبته للرحيل)
الملثم : خسارة أنى أقتلك أنت من دون الناس
ياسونيا .. لكن ما باليد حيلة ..
سونيا : (فجأة وبصوت عال) ٧ - ٣ - ٩ - !
الملثم : هى دى الأرقام ؟
سونيا : (فى حالة ذهول حقيقى) كنت حاتقتلنى
صحيح عشان شوية جواهر وفلوس ؟
الملثم : بكل أسف ..
سونيا : روح الانسان رخيصة للدرجة دى ؟
الملثم : بالعكس - فيه أرواح غالية وأرواح رخيصة ..
وحاشرح ده بالتفصيل .. أحنا فى الوقت ..
(بيبدأ فى التحرك نحو الخزانة وقد
صوب المسدس نحو سونيا)

قومي بقى وقربى منى كده لحد ما تنتهى من
المهمة على خير .. أيوه أيوه كده .. قربى
كمان .. (يبدأ فى فتح الخزانة) تمام .. كده
كليك .. وكده كليك .. وكده .. ياما أنت كريم
يارب !

سونيا : أبعد بقى ؟

الملثم : فى مكانك ! غريبة .. أول مرة أشوف فيكى
الجمال الساحر ده

سونيا : دا اللي فى علم النفس بيسموه
ترانسفيرنس transference

الملثم : يمكن ! لكن .. ياسلام على الجمال الفتان ..
سبحان من خلق وصور ..

سونيا : ومعناه تحويل معنى حاجة لحاجة ثانية .. زى
مابا لبلدى بنقول نلبس طاقية ده لده !

الملثم : الله ! مش دكده أسمه
البروجشكن (Projection) ؟

سونيا : ما هو الإسقاط نوع من التحويل ..

الملثم : ممكن يبقى إسقاط تحويلى وممكن يبقى
إسقاط مباشر ..

سونيا : أنت باختصار شايفنى حلوة عشان فرزت
بالجواهر ..

الملثم : تفسير ساذج وسخيف .. (يفحص الجواهر
بمنظاره)

سونيا : أزاى بقى ؟ دا واضح زى الشمس ..
الملثم : لأن معناه ان أنا كنت شايفك وحشة قبل كده ..
وده ماحصلش - طول عمرى أقول سونيا أحلى
بنت فى الوجود ..
سونيا : (تلين قايلا) دى مبالغة دى .. لا لا .. مش فى
الوجود !
الملثم : بس يمكن سحرك بالليل يختلف عن جمال
النهار ..
سونيا : وأنت متعود تشوف الناس بالليل !
الملثم : قصدك أثناء عملياتى؟ (يضحك بسخرية)
معظمهم ما يتشافوش صدقيني ..
سونيا : آمال أنا فى إيه مختلف ؟
الملثم : (يضع المنظار جانبا ويواجهها) فيكى ؟
(يتأوه) حلم بيحاول يتحقق .. لكن نور النهار
بيطمسه .. جمال عايز يخلق فى الملكوت لكن
حبال الأرض بتشده .. خيال بيتواثب من مكان
لمكان .. من قلب لقلب .. من روح لروح .. لكن
ما فيش لا مكان ولا قلب ولا روح تساعه ..
سونيا : (سعيدة بما سمعت) أنا كل ده .. معقولة
دى ؟ الشعرده كله .. ببقى أنا ؟
الملثم : منك لله .. نسييتيني الوقت .. خدى بقى
جواهرك العيرة .. وأنا حاتوكل ..
سونيا : عيرة ؟ عيرة أزاى ؟ (صدمة رهيبة)

الملثم : هو تقليد ممتاز .. يعنى الأصل بتاعه موجود ..

والقزازده معمول عليه ..

سونيا : (تفريق من أحلام الجمال على بشاعة

الواقع) قزاز إزاي ؟ موش ممكن يا أستاذ ..

مستحيل يا أستاذ .. دا الورق بتاعهم

موجود .. شهادات المصنعية .. كل حاجة ..

الملثم : ع العموم أنا كسبت لحظات موش حتكرر فى

حياتى .. لا خفة الدم ولا الذوق الرفيع ولا

الأخلاق العالية .. كل دول ماقدروش يغطوا

الكحل الربانى .. ولا الخجل الأصيل اللى

حايئك من كل خد .. باى باى..

الملثم : يارب ليه الكابوس ده ؟ الأملات دى عيرة

ياخواتى ؟ البنططيف Pendentif ده عيرة ؟ ده

المفروض انه برقع مليون ..

الملثم : جربيه .. شوفيه ..

سونيا : إزاي يا أستاذ - (تتردد) فريد (فى خجل)

مش فريد مراد برضه ؟

الملثم : (يقترّب منها فى ود وقد وضع المسدس

فى جيبه) عرفتى امتى ؟

سونيا : من ساعة ماقلت «دى بون فوا» ..

الملثم : ومع ذلك لعبتى ؟ لعبتى تمام !

سونيا : بس ياخسارة ! باظت اللعبة .. أنا كده .. جظى

كده !

الملثم : (يضحك) قصدك أنها لما طلعت عيرة طار

الحلم ؟ يابنت الناس أنا طول عمرى عارف

انها عيرة ! لأن أنا اللي عاملها !

سونيا : موش ممكن ! أنا مخى أتبرجل .. أنا خلاص ..

موش قادرة أفهم ولا أسمع ولا اتكلم .. (كأن

بها دواراً تجلس على كرسي) ميه وحياتك

يافريد ..

الملثم : اتفضلى .. الموضوع بسيط جداً .. انت فاكرة

في صورة التخرج لما وقف الأستاذ شرقاوى

وقال « الغالى هنا .. والرخيص هنا » ؟

فاكرة ؟

سونيا : كانت نكتة ..

الملثم : لا ماكانتش نكتة أبداً .. شرقاوى كان مدقق

وعارف الدنيا كويس ..

سونيا : يعنى عنده خبرة ..

الملثم : لأ .. أكثر من خبرة .. كان عنده حدس عميق ..

بصى حواليك .. انتوساكنين فين ؟ فى ضاحية

خضرا شكلها أوربى وتخطيطها أوربى ..

الفيلة قديمة لكن منظرها غالية ..

سونيا : دى كلفت جدوالله يرحمه خمسميت جنيه ..

الملثم : ماقصدش غالية فى الثمن ..

سونيا : قصدك فى الذوق .. فى الشياكة

الملثم : موش بالضبط .. قصدى فى إنها تنتمى للعالم

القديم .. عالم الطبقة الارستوقراطية الطبقة
المتميّزة واللى كان كل واحد يتمنى يكون
منها ..

سونيا : دا معنى غالى ؟

الملثم : أنا الحقيقة موش قادر أفسر كلام شرقاوى
بالضبط .. لكن لو بصيتى فى الدنيا حوالينا
حتلاقى شعوب أرواح أهلها رخيصة ..
وشعوب أرواح أهلها غالية ..

سونيا : دا مفهوم .. عشان الهوة الشاسعة بين الدول
الصغيرة والكبيرة أو الضعيفة والقوية .. لكن
علاقته إيه بالمجهرات العيرة ؟ صلتة إيه ؟

الملثم : أظن صلتة واضحة خالص ياسونيا ..
المجهرات العيرة منظر .. شكل .. ورمز .. لكن
إضربى حته ألماظ عيره بشاكوش .. جربى !

سونيا : حتتشفش طبعا ..

الملثم : لأنها قزاز .. مش ألماظ ..

سونيا : قصدك فيه ناس قزاز وناس ألماظ ؟

الملثم : قصدى ان الاثنين شكل واحد .. وماتقديش
تفرقى بينهم إلا بالشاكوش ! كانوا زمان لما
يجيبوا أخبار الحرب يقولوا مات ألف من
الأعداء .. وثلاثة من عندنا وهم فلان وفلان
وفلان .. يعنى شوف قيمة كل فرد قد إيه .. أما
الأعداء دول فالعدد فى الليمون ..

سونيا : ولحد النهاردة فيه حوالينا ناس من دول وناس من دول ..

الملثم : ومن هنا لقيتني بأبعد عن الوظيفة وقيودها والقشرة التي بتغطي بيها كل المواطنين ..

سونيا : وتشغل حرامى ؟ قصدى بالأعمال الحرة ..

الملثم : مين قال لك إن دى شغلتى ؟

سونيا : إنت يا فريد !

الملثم : أنا قتلتك إنى لص ؟

سونيا : أيوه بس لص شريف .. أقصد .. إنت زعلت يافريد ؟ حقك على ..

الملثم : إحنا جواهرجية فى الصاغة ولنا فرع فى باريس .. ولأزم تكونى شفتى اسمه فى وثائق

المجوهرات لوريان L'Orient

سونيا : طبعاً .. يا خبر .. أما أنا مغفلة

الملثم : لا .. معذورة .. أسيبك أنا بقى ..

سونيا : فريد ! انت بتقول انت اللى عامل الأملات العيرة دى ..

الملثم : (يعيد ترتيب المجوهرات كما كانت وإعادتها إلى الخزانة)

سونيا : (صارخة) سامعنى ؟

الملثم : وطى صوتك أحسن تصحى منيرة !

سونيا : والجواهر الأصلية راحت فين ؟

الملثم : عندى يا حبيبتي ..

سونيا : سرقتها ؟
الملثم : وبعدين معاكى بقى ؟
سونيا : أمال بس جات لك إزاي يا فريد ؟
الملثم : أصحابها جابوها لى عشان أعمل لهم زيه ..
والصناعى عبدالمأمور ..
سونيا : تعمل زيه وترجعها ؟
الملثم : لأ .. واشترىها ..
سونيا : انت عارف الكلام ده معناه إيه يا فريد ؟
الملثم : طبعاً .. أمال إيه اللى جابنى هنا النهارده !
سونيا : ان إحنا ع الحديدة .. ان إحنا انتهينا ..
الملثم : فشر .. انتى حاجة وهما حاجة .. انت تحت
عينى من يوم التخرج .. إنتى كملتى دراستك
وأنا اشتغلت أعمال حرة لكن مافيش يوم غبتى
عن عينى ..
سونيا : أمال أنا ماشفتكش ليه ؟
الملثم : لآنك ماكنتيش عايزة تشوفينى .. كان شاغلك
حلمى وشلتك اللى بيلفوا حواليكى زى
الدبابير ..
سونيا : قصدك عايزين يتجوزونى ؟
الملثم : هما حيالقوا أحسن منك ؟
سونيا : بتكلم جد يا فريد ؟ أنا حلوة يعنى ؟
الملثم : طبعاً ياسونيا طبعاً .. لكن المسألة مش مسألة
حلاوة .. بكرة تعرفى إن شاء الله ..

سونيا : (تحتجزه بعنف) وأنت .. يافريد ..
الملثم : أنا إيه ؟
سونيا : مش عايز تتجوزنى ؟
الملثم : هو أنا أطول ؟
سونيا : أmaal ما حدش اتقدم لى ليه ؟ منيرة خطّابها
واقفين طابور !
الملثم : أنا خلصت مهمتى النهاردة ولو أتأخرت دقيقة
واحدة حبيدأوا يسألوا عنى ويدوروا على ..
لازم أمشى ..
سونيا : (تشده من ذراعه) حاشوفك تانى ..
الملثم : بعد السنين دى كلها .. اقرب مما تتصورى !
(يخرج بسرعة - إظلام - إضاءة نهائية)
أزهار : (هامسة) أرجوك يا حلمى .. أرجوك ..
حلمى : أزهار أرجوكى .. اسمعيني
أزهار : مش دلوقتى بقول لك .. (هامسة) حد يمكن
يصحى فجأة !
حلمى : دول كلمتين قبل ما حد يصحى .. هوّ أحنا
بنسرق ؟
أزهار : أنا قلت لك طلبى أمبارح
حلمى : افهميني أرجوكى .. أنا قبل ما أجيك أمبارح
اتصلت بالتليفون بسونيا .. كانت صاحبة
وبتحضر محاضرتها .. وكات لوحدها ..
أزهار : غريبة .. فتحى كان فين ؟

حلمى : أنا سألتها قالت خرج ومش حيثأخر ..
أزهـار : لازم راح للست المقرفة بتاعته تانى ..
حلمى : ما نا ماسككش .. بعث وراه اتنين من
حبايينا ..
أزهـار : دول اللى عطوك الورقة وأحنا خارجين ؟ (فى
ذهول) يانهار..
حلمى : شفتيهم قبل كده طبعاً !
أزهـار : أنت عارفني بالليل ما با شوفش كويس.. لكن -
حلمى : ضرورى عرفت حد منهم على الأقل .. على
الأسمرانى ..
أزهـار : قصدك الكحلـى !
حلمى : أهو ده اللى كان بيشتغل عندى وانتقل عندها ..
أزهـار : لكن لسه مخلص لنا ؟ قال لك حاجة ؟
حلمى : أكدوا لى الإتنين أنه قضى الليلة هناك ..
ويمكن بات كمان هناك ..
أزهـار : أنت ما شفتوش لما رجع أمبارح ؟
حلمى : حاشوفه فين ؟ وصلتك هنا وجريت ع
المهندس.. وأدينى -
أزهـار : يعنى ممكن فتحى ما باتش هنا ؟
حلمى : إنت بصيتى عليه الصبح ؟
أزهـار : أبص عليه دلوقتى .. (تخرج مسرعة)
حلمى : (وحده على المسرح) . والآن وقد اكتملت
الخطة وانتظم عقد حباتها .. (يرقص طرباً)

فين الفطار؟ فين القهوة السخنة والعيش
الطازة؟

أزهار : (تعود) حلمى .. اللي إحنا كنا عاملين حسابه
حصل .. فتحى باعنى رخيص بعد العمر ده
كله .. بعد ما فتحت له بيتى .. وكنت له أكثر
من زوجة .. وأخلص من صديقة .. بعد ما
عطيته ما أملك ومالا أملك ..

حلمى : أرجوك يا أزهار بلاش حماسة الا اما نتأكد ..
أزهار : بعد كل ده حاتقوللى ما فيش علاقة ؟ (تخرج
من شنطة يدها أوراقاً كثيرة تبعثرها
على الأرض فيجمعها هو بحذق ويرتبها
فى يده) بعد ده ؟ وده ؟ وده ؟ ناقص إيه قول
لى أرجوك؟

حلمى : شوفى يا أزهار يا حبيبتي .. أنا آخر حاجة أفكر
فيها نفسى .. من يوم ما اتوفى المرحوم وأنا
تحت أمركم .. خصوصاً اليتيمة التى حرمت
حنان الاب ..

أزهار : وإحنا من غيرك كنا حتعمل إيه ..
حلمى : ربنا مع الجميع يا أزهار هانم .. واللى بيريده
ربنا بيتم .. يعنى يوم ما تقدم لك فتحى وكات
سونيا ياروحى لسه نونو .. فتحت أنا بقى ؟
قلت لك كلمة واحدة عنه ؟

أزهار : أرجوك يا حلمى .. أرجوك .. ما تفكرنيش ..

حلمى : أنا قصدى إنك تتمهلى شوية .. قبل ما تاخدى
خطوة كده والاكده ..

أزهـار : ما بقاش فيه غير خطوة واحدة يا حلمى
ياخويا .. (تتفجر باكياً على كتفه) لازم
تنفصل .. واللى عايزه .. حنديهوله !

حلمى : (يبعدھا برفق) لا لا لا .. بيقى غلط كبير ..
موش اللى عايزه .. لا .. اللى إحنا عاوزينه ..

أزهـار : موش فاهمة !

حلمى : إذا كان عليه هو .. عايز كل حاجة .. يغمه ..
طعمة .. وسية .. ثروة تركها عمريك الله
يرحمه .

أزهـار : إحنا نديله المعلوم وخلص ..

حلمى : الله ينور عليكى يا أزهـار هانم ..

أزهـار : يعنى .. تفكر .. قد إيه (بدأ القلق
يساورها)

حلمى : حاشا لله اتكلم على رجل لسه زوج حضرتك ..

أزهـار : لا لا لا .. اعتبر الموضوع منتهى .. إحنا جرى

لنا إيه ياناس فى البلد دى ؟ كل واحد عايز

ينهش لحم أخوه ؟ البنت الغلبانة اللى نايمة

فوق دى .. ماحدش فكر فيها ؟ مافكرش إنه لما

يهد البيت على دماغنا حيحرم بنت يتيمة أنها

تتستر فى حياتنا ؟ ماقالش والبنت دى ذنبها

إيه ؟

حلمى : أنا من ناحيتى انتى عارفة .. رسمى !
أزهار : إنت من ناحيتك عنصر دهب .. هو فيه زيك النهارده فى الدنيا ؟ لكن أنا بافكر فى موضوع الوصية .. انت عارف ان عمر بيه أبوها الله يرحمه مصمم إنها تتجوز اللي تختاره بنفسها ..

حلمى : طب ولنفترض إنه يعنى ..
أزهار : مانفترضش يا حلمى ياخويا .. لو شرط واحد م الوصية ماتنفذش . تسقط الوصية كلها .. الجواهر والأموال والأموال .. لازم سونيا توافق عليه بنفسها ..

حلمى : طب وماله .. نخليها توافق يافندم .. إحنا ..
(يفكر ويدور فى حلقات) إحنا ..

أزهار : قصدك إيه ؟

حلمى : (يضحك) لا ولا حاجة .. دى مسألة يسيرة .. إحنا دلوقتى فى الباشا صاحبنا .. حانعمل معاه إيه ؟

أزهار : إحنا موش اتفقنا ؟ اسمع .. اسمع .. أهه وصل .. ده صوت عربيته .

حلمى : (هامساً فى حرج) حنقول له إيه ؟ كام ؟ قولى يامدام أزهار .. مافيش وقت !

أزهار : كل مايبات بره الله يسامحه يرجع سابق الرولزرويس .. (Rolls Royce)

حلمى : أيوه أيوه لكن - (فى لحظة حرج رهيب) ما

اتفقناش ..

أزهـار : زى مايكون بيتفشخر انه كان بايت برة .. وال

بيسوقها بنفسه ! الله يرحمك يا باشا ..

ماكانش يستعنى يعيئه شوفير عنده ..

حلمى : سيادتك سيبيتها له ؟

أزهـار : أنا ؟ فشر ! أنا أسبيله الرولز ؟

(سونيا داخلـة كمن نهض لتوه من

النوم)

سونيا : رز إيه ع الصبح ياماما ؟

حلمى : (يضحك ضحكاً مبالغاً فيه) رز .. قال !

دى بتكلم على الرولز .. على العربية الرولز

رويس !

سونيا : ما تأخذنيش يا عمى حلمى .. أصلى لسه

قائمة من النوم ..

حلمى : موش عوايدك تصحى متأخرة .. (يلاطفها)

يا أميرة !

سونيا : أصلى جالى كابوس ..

أزهـار : كل واحد فينا جاله كابوس !

حلمى : (يضحك بمبالغة) الله ! حلوة قوى دى ..

ماما النهاردة مزاجها رايق ..

سونيا : مش تسألونى جالى إيه فى الكابوس ؟

أزهـار : الكابوس لو إتحدى يحصل !

(يدخل فتحى مع فريد ووراءهما منيرة)

تحمل صينية عليها شاي وبسكوت)

أهو حصل !

فتحى : صباح الخير ! إيه كفى الله الشر !

سونيا : (تفرك عينيها) أما أنا فلسة بأحلم ..

فتحى : ياخوانا موش تفهمونا إيه الألفاز دى ع

الصبح ؟

حلمى : اسأليه يامدام أزهار كان فين إمبراح ؟

فتحى : وهى عينتك مندوب تسأل بدالها ؟ اسألى

يازوزو اللى إنتى عايزاه ..

أزهاران : (تستجمع شجاعته) أيوه .. هو ده

السؤال !

فتحى : زى ما يكون فيه إدانة قبل الاتهام والمحكمة !

حلمى : دا سؤال بسيط .. ممكن تجاوب ..

فتحى : يعنى لازم قبل الشاي ؟

(يتجه إلى الصينية ويلتقط فنجاناً

ويبدأ فى شرب الشاي ثم يتجول فى

الغرفة . سونيا تتجه إلى المكتب وهى

تخالس فريد النظرات)

سونيا : هو بابا بات برة ليلة إمبراح ؟

حلمى : أيوه .. اسأليه كان فين ؟

فتحى : شاي ممتاز .. مين يصدق أن ده يطلع من إيد

منيرة .. (ينادى عليها) منيرة .. منيرة ..

(تدخل منيرة)

تحبى تتجوزى يوم الخميس ؟
منيرة : اللى تشوفه يا سيدى ..
فتحى : وتبقى تجيلنا برضه زى ماتحى ؟ ..
منيرة : اللى تشوفه يا سيدى ..
فتحى : خلاص .. حضرى نفسه بقى ..
سونيا : لا .. هنا بقى .. لازم أعترض ..
فتحى : تعترضى على إيه يا حبيبتى ؟
سونيا : لازم البنت تكون موافقة على العريس .. لازم
تكون شافته !
فتحى : ومين قالك إنها موش موافقة ؟
سونيا : شافته ؟
فتحى : عشرين ألف مرة !
سونيا : اوعى يكون سفروت اللبان !
فتحى : ناصحة يا كتكوتة .. ومفتحة !
سونيا : حرام عليك وده حيلته حاجة !
فتحى : أهو ربنا بيرزق ياستى .. وإن شاء الله نعملوا
لك فرح مشترك فى الجنية هنا ..
سونيا : فرحى أنا ؟ أنا حاتجوز ؟ (نصف مصدقة
ونصف مذهولة) إزاي ؟
فتحى : مشوار يستاهل البيات برة ؟
سونيا : البيات ليلة واحدة ؟ ماترجعش خالص يابابا !
فتحى : بس لازم توافقى على العريس !

حلمى : (فجأة زى المدفع) وقعت يا فتحى ! أهوده
الشرط اللى فى الوصية واللى أنا أحققه .. أنا
اتقدمت رسمى لسونيا ومدام أزهار -
فتحى : (صارخاً) ممكن تسكت أنت ؟ ممكن أكلّم
بنت مراتى .. وبنت ابن خالتي عمر صبرى الله
يرحمه !؟ ممكن أقول لها حاتجوز مين ؟
سونيا : إيه الحكاية يا بابا ؟ الواحد ينام ويقوم و ..
يقوم يلاقى عريسين مرة واحدة ؟ عندك عريس
تانى ؟ طلع فجأة ؟
فتحى : والله هو ما طلّش فجأة ! ده بقى له كتير
مستنى .. وبعدين جالى إمبارح بالليل !
سونيا : جالك بالليل ؟ إزاي ؟
فتحى : بعد ما خطبك .. ووافقتى .. شرط الوصية يا
حلمى !
أزهار : يا سونيا إنتى موش بنتى ؟ أنا ما ليش فيكى
نصيب ؟ ممكن تفهمينى ؟
فتحى : هو الحقيقة شك فى أن الأملّاطات اللى كان
بيبيعها له حلمى أفندى .. على أنها من ميراث
العيلة القديم .. مش بتاعته أصلاً ..
حلمى : أهوده الكذب بعينه .. أنا لا بعث ولا
اشتريت ..
فتحى : ولذلك قرر أنه يشوف إذا كانت المجوهرات
الأصلية اتسرقت كلها .. واتباع .. والا لسه
فيه منها شوية !

حلمى : أنا حاتصل بالمحامى بتاعى .. دى تهمة لا
يمكن أقبّلها ع الصبح .. فين التليفون .
فتحى : (غير ملتفت إليه) وراح - بالاتفاق معاى -
داخل الفيلا عشان يمثل دور لص مسلح ..
وأنا عطيته مسدس الصوت القديم .. وقلت له
يعمل إيه عشان يوصل للألماظ ..
سونيا : هو بقى ساق فيها ورعبنى وأغمى علىّ ..
فتحى : دا بيقول إنه خطبك وإنّتى وافقتى ..
سونيا : الحقيقة مش فاكرة ..
فريد : نفسى أتكلم .. افتح بقى زيكم ..
فتحى : هو إنت بطلت فى المشهد الأول ؟
حلمى : أنا إتصلت بالمحامى وحارفع عليكم قضية سب
وقذف ! حارب بيتكم ..
فريد : مافيش داعى يا حلمى بيه .. أنا عندى جميع
مستندات البيع والشراء .. وعلب السيغة المعدن
والقطيفة .. وصماتك مالية المحل !
فتحى : يعنى عايز توديه السجن يا فريد ؟ ده تصرف
عريس برضه ؟
حلمى : سجن ؟ سجن إيه ؟ لا يمكن ؟ مدام أزهار ...
أوعى تصدقى حاجة م الكلام ده .. حاقول لك
فتحى كان فين ليلة إمبراح !
أزهار : أيوه قول أرجوك ..

فتحي : عند الست زينب جمعة .. وكيلة حلمى أفندى

أبوالفتوح فى شرا كل الأراضى التى حصل
عليها مؤخراً فى البدرشين ..

أزهار : دى بقى عزبة البدرشين ؟

فتحي : من أموال مدام أزهار النقار .. وسونيا عمر

ضبرى .. اللى أنا ماقدرتش أفهمه أبداً هو إيه
اللى لمكو على المدعو حلمى زفت ده ؟

أزهار : مش إنت اللى قلت إنه صديق العيلة .. وزى
أخوك ..

سونيا : لا يا ماما .. دا هو اللى قال إنه زى أخوه ..

وزى أخو بابى الله يرحمه

فتحي : لكن إزاي ؟ إزاي فجأة نلاقى واحد وسطنا ..

بيتغدى معانا .. ويرسم على جواز البنت اللى

مكتوبة الفيلا باسمها .. ويبيع الجواهر

ويشترى بيها عزبة فى البدرشين ..

فريد : أهو ده اللى كان نفسى أفهمه لسونيا م

الصبح .. (يضحك) والآن الليل .. حلمى

مشكلته انه رخيص .. مالوش معدن .. زى

القماش اللى لما تمسكه يلب فى إيدك !

سايط .. زى اللبن المية ! ورغم إنه عنده عزبة

فى البدرشين فعلاً إلا إنه طول الوقت حاسس

إنه رخيص .. مدام أزهار ماتملكش ربع اللى

عنده

سونيا : حتى بعد رجوع الألمان ؟
فريد : حتى بعد رجوع الألمان .. ورغم إنها لا تقارن
بـه .. فهي غالية .. عندها مبادئ وقيم وأصول
اتربت عليها .. ما تعرفش الفرق بينها وبين
منيرة اللي حتجوز اللبان وحتركب عربية طبعاً
وتشتري شقة خاصة بيها ..
سونيا : إزاي ماتعرفش الفرق يا فريد .. دانت لخبطت
علم الاجتماع خالص !
فريد : أقصد ما يهمهاش الفرق .. ومنيرة عندها أودة
مستقلة زى كل فرد فى الأسرة .. وأباجورة
جنب السرير
سونيا : وعشان كده أثرت الموضوع امبارح ؟
فريد : انتى اللي أثرتيه ! الرخيص يا حلمى ياكل
القول المدمس بالشوكة والسكينة لأنه نفسه
يبقى غالى .. لكن إحنا فى أكبر محل
جواهرجية فى البلد .. وهنا فى قصر الباشا ..
بنغمس القول بالعيش البلدى !
حلمى : يا أستاذ فريد إنت راجل عبقرى .. وكريم
النفس .. وغالى ! وغالى ! (يضحك) والله
ولا فى أمريكا .. ياترى عملت إيه فى الأمانة ؟
فريد : ماتخافش يا حلمى أفندى ..
حلمى : ما أخافش إيه ؟ لا أخاف أوى ! أرجوك قول
لى الموقف إيه ؟

فتحي : تعيش وتأخذ غيرها يا حلمى .. اشرب الشاي

زمانه برد ..

فريد : فى الواقع لما بدأت الحكاية دى من فترة

قصيرة .. كنت حاطط عيني على زميلتى

السابقة فى الكلية سونيا عمر .. وماكانش

يخطر لى .. ولا فى الأحلام إنها تلتفت لى ولا

تهتم بى طبعاً !

سونيا : (سعيدة) لكن انت كنت بتراقبنى ؟ كنت

بتمشى ورايا يا فريد ؟ اسمع .. كتبت فى

شعر ؟

فريد : عملت كل حاجة ممكنة ! حفظتها صم .. ولما

جانى صاحبنا بأول حطة مجوهرات مارصيتش

ابيعها ولا اشتريها .. اعتبرتها رهن وعطيته من

فلوسى اللى هو عايزه ..

سونيا : كان التيارا (tiara) ! لازم شفته فى فرح !

فريد : كان حلق !

سونيا : مش ممكن وازاى حتشوف حلق صغير ؟

فريد : دا هو اللى خلانى أطلع جواهرجى !

فتحي : يعنى إذن حلمى مديون لك بقيمة المجوهرات ..

فريد : وأنا مدين لكم بالمجوهرات !

حلمى : كام ؟ قول قد إيه ؟ حادف لك فوراً ..

فتحي : ومستعجل على إيه ؟ إنت حتدفع على مهلك ..

بعد فرح سونيا ومنيرة ..

فريد : لا لا لا ! دانا حادفعه اللى وراه واللى قدامه ..
لأن أسعار المجوهرات غليت واللى كان بعشرة
بقى بعشرين .. يا كده يا السجن ..
حلمى : يانهار .. دا ولا فى أمريكا !
(يضحك الجميع)
(إظلام)

مطابع الهيئة المصرية العامة للكتاب

رقم الايداع بدار الكتب ٨٩٦٧ / ٩٣

I.S.B.N 977-01-3521-6